



Now Available!

POM: 313 9800
LAE: 472 5488

THEODIST LTD
THE STATIONERY SUPERMARKET

**KRISMAS KADS
LONG LAIK
BILONG YU**



200x ful kala kads wantaim envelop
K550
ikam wantaim takis

Only at...

THEODIST LTD
THE STATIONERY SUPERMARKET

Waigani Drive, POM 325 6500
Markham Road, LAE 472 5488

sales@theodist.com.pg saleslae@theodist.com.pg

INSAIT:
Nogat halivim long gavman long ol plentesen wokas long ENB- P3



O.R.S operesen long Bogenvil i stat long dispela wik - P6



PNG rais projek i stat long Sentral provins -

P20 **Bisnis**

PIH Saveman
Nias
Laipstail sik -
Daiabitis
bagarapim
helt bilong
maus - P7



Redi long Palamen i stat...

Palamen Spika Theo Zurenuoc wantaim ol wok man bilong em i redi long go insait long opim palamen sindaun bilong dispela mun. Palamen bai gat liklik senis long en taim Praim Minista Peter O'Neil i rausim pati bilong Don Polye long gavman bilong em. THE pati nau bai stap long oposisen sait bilong palamen.

Poto Nicky Bernard.

Oposisen singaut long pablik protes

Stanley Nondol i raitim


Kwik investigesen bai kamap: PM

OPOSISEN i singaut long ol pipel bilong Papua Niugini long joinim ol Non-Gavman Ogenaisesen (NGO) na putim pablik protes long pait namel long ol memba bilong polis fos bikos ol politisen i wok long go insait long fos na kontrolim wok bilong polis.

Oposisen lida, Belden Namah wantaim deputi bi-

long em, Sam Basil na Memba bilong Rabaul, Dokta Allan Marat i mekim dispela singaut long aste bihain tasol long Praim Minista Peter O'Neill i tokaut long Palamen olsem wok painim bai kamap long pait namel long ol polis na ol bikhet pasin bilong ol memba bilong polis fos.

I go moa long pes 2..



DEBT

Is the **weight** too much?

Transfer your **balance** and we will pay off your **DEBT**.

- Low Interest @1% p.m
- Suitable Terms & Conditions
- Flexible Repayment Terms
- Accessible
- Affordable

watch your savings grow

Oposisen singaut long pablik protes...

I kam long pes 1...

Mista Namah i tok olgeta pipel i kam aninit long wanpela lo bilong kantri, na sapos ol i gat asua polis i mas arestim o holim pasim ol na i no ken banisim ol wantaim ol bikpela gan. Ol polis i mas stap independen na mekim wok olsem ol i bin promis long mekim taim ol i sainim tok promis.

Las wiken long Pot Mosbi, ol sampela polisman i paitim Frod Investigeta Sajen, Patric Primenga long hevi bilong Paraka keis we Mista Primenga i kisim tok orait long Nesenel Frod na Enti Korapsen Dairekta, Mathew Damaru long givim kontemp sas pepa long ol sampela sinia polis opisa bihainim disisen bilong Suprim Kot.

Praim Minista O'Neill i tok klia long Palamen olsem hevi bilong Paraka keis na arest warent bilong em i stap yet long kot.

Em i tok dispela hevi i kamap bikos ol sampela man husait i no memba bilong polis fos i wok long go insait na laikim polis bai mekim wok bilong ol ausait we i no stap long lo.

Praim Minista i tokaut olsem wanpela intenetel investigesen bai kamap kwik long dispela hevi.

Em i tok wok painim bai kamap long ol polis bikos i gat planti ripot i kamap olsem ol polis i mekim pasin i asua na i no go gut wantaim wok bilong ol.

Mista Namah wantaim ol memba bilong Oposisen i tokim nius olsem polis fos i no stap stret taim gavman i makim Geoffrey Vaki long posisen bilong komisina taim hevi bilong Paraka i kamap. N aingaut long pablik i mas putim protes.

Oposisen i tok dispela investigesen we Mista O'Neill i tokaut bai noinap helpim long stretim pait namel long ol polis. Ol i tok em bai mekim hat long wok bilong polis long ol wok ol i laik mekim.

Bihain long hevi i kamap long wiken, ol Pot Mosbi polis i go long opis bilong Frod na Enti Korapsen long Konedobu na banisim opis long ol polis opisa i no ken givim kontemp sas pepa long ol senia opisa.

Mista Namah i tok ol dispela polis i no mekim wok bilong kantri. Ol i mekim long amamasim wanpea o tupela man tasol na singaut long ol i mas lusim Frod Skod opis.

Long wankaintaim, Polis Komisina Geoffrey Vaki i stap long miting bilong Pasifik Polis Sif long Nu Silan i tok em bin givim edvais long olgeta opisa bilong em long noken mekim wanpela samting long keis bilong Paraka bikos i gat kot oda i stopim polis long arestim Praim Minista na dispela i stap yet.

Mista Vaki i tok Mista Damaru i kisim tok orait long Ekting Polis Komisina Deputi Komisina, Awen Sete na mekim sas bilong contempt long sampela senia polis opisa long keis bilong Paraka.

Lidasip i mas go pas long soim rot - Minista Temu

MINISTA bilong Pablik Sevis na memba bilong Abau, Dokta Puka Temu i no bin amamas tumas long de bilong lonsim nupela Pablik Sevis Menesmen Ekt long Mande dispela wik, bilong wanem em i harim wanpela stori nogut bilong wanpela tisa long ples bilong em long dispela de.

Sir Dokta Temu i tok long olgeta wan wan de insait long kantri long ol bus ples ol liklik sumatin olgeta moning i save sanap long lain na singim nesenel antem na kolim nesenel tok promis nating, tasol sevis i no save go kisim ol. Bilong wanem i gat ol pablik sevan i stap nating na kisim pei na i no mekim wok bilong ol.

Dokta Puka Temu i tok em i bin wari tru long dispela Mande moning long taim wanpela brata bilong em i tokim em olsem, pikinini man bilong em i stap long gret 8 long skul insait long Kupiano na em i wari long wokim gret 8 eksam long neks wik. Bilong wanem tisa bilong



Memba bilong Abau, Dokta Puka Temu.

em i no save kamap long skul na skulim sumatin. Dispela boi em i tok i laik ripit long gret 6 neks yia bikos em i no laik long pundaun long eksam bilong em.

Dokta Temu i mekim dispela stori long ol provinsel edministreta, ol deputi, ol dipatmen seketri na ol deputi wantaim sif sekretri, Manasupe Zurenuoc na Sekretri bilong Dipatmen bi-

long Pesenal Menesmen olgeta wokman meri bilong en long taim bilong lonsing.

Dokta Temu i tok, "Mi yangpela yet mi kamap wanpela pablik sevan na bihain mi kamap politisen. Mi save long wanem samting mi toktok long en. Papa bilong mi i tokim mi long kamap dokta bikos em i bin lukim planti man kisim bagarap long taim bilong Wol Wo 2 we em i bin wanpela man bilong karim kago bilong ol soldia."

"Taim mi wok dokta stat long trening taim bilong mi yet, em ol nes i no save paul long wanem hap mi stap, taim mi stap long on kol, " Sir Puka i tok.

Em i stori long wanem kain komitmen ol pablik sevan i mas i gat long sevim nesen long go strong moa yet.

"Tripela samting pablik sevan i mas mekim long sanap strong long wok bilong yu. Bilip long God, Bilip long yu yet na bilip long kantri bilong yu!" em i tok.

Sir Puka i tok dispela nupela Menesmen Ekt bilong Pablik

Sevis bai i wok wantaim strongpela lidasip. Em i tok olgeta plen bilong givim stia long wok olsem Visen 2050, 2010-2015 stratejik plen na ol 5 yia plen i stap long mekim wok.

Tasol lida i mas sanap strong na yusim atoriti bilong ol na mekim ol man aninit long ol i mekim wok bilong ol na kantri bai go het.

Sir Dokta Temu i tok, kantri i wok long go klostu long lukim bikpela skel bilong mani kapsait we ikononi bilong PNG bai gro 20-21 pesen winim olgeta kantri na bai kamap wanpela kantri bilong ol blak man i gat planti mani long wol.

Em i tok, "kisim dispela wan sistem bilong pablik sevis na rolim long graun."

Pinis.

Poto: Minista Sir Dokta Puka Temu wantaim Sekretri John Kali na Sif Sekreteri, Manasupe Zurenuoc wantaim ol dipatmen het na ol provinsel edministreta i sanap kisim poto bihain long lonsim nupela Pablik Sevis Menesmen Ekt.

DWU laibreri kisim ol nupela buk samting bilong Mikloulcho-Maclay

DIWAIN Wod Yunivesiti (DWU), ol pipel bilong Madang na PNG nau i ken lukim na ritim ol wok bilong histori bilong ol Rai Kos pipel, na tok tenkyu i go long wanpela biknem Rasia man husat i bin karimaut wok risets 143 krismas i go pinis.

Nicolai Mikloulcho-Maclay em biknem Eksplora na Naturelis bilong kantri Rasia i bin kam sindaun long ples Gorendu long Rai Kos, Madang long yia 1871.

Long las wik, ol bin holim wanpela liklik seremoni long Madang Risot we tupela lain bilong biknem Mikloucho-Maclay em long Valeri Sourin na meri bilong em, Irma Bruni i bin kam na givim sampela buk na filim i gat ol wok na laip bilong biknem man ya i stap long en.

Insait log seremoni, tupela marit i bin prisanim ol buk na filim i go long Presiden bilog DWU, Pater Jan Czuba we em i putim nau long DWU Frensis Laibreri long ol sumatin na risets lain i yusim log ol wok bilong ol.

Taim Pater Jan i tok tenkyu i go long Sir Peter Barter em Siaman bilong Melanisen Faundesen, em bin tok Sir Peter i yusim bikpela taim, hatwok na mani long lukim olsem PNG i gat evidens long ol samting i kamap bipo na ol lain i kam bihain i ken lainim long em.

Ol lain i bin go tu long ples Gorendu long lukim siwol na



Peter na DWU Presiden, Pater Jan Czuba i soim ol sampela buk we Valeri Sourin na meri bilong em i bin prisanim i go long ol long Madang.

nupela memoriel ston i gat raiting long em ol i sanapim long tingim memori bilong Mikloucho-Maclay.

Dispela wokabaut i bin makim stret 143 krismas taim biknem man ya i bin go kamap long ples Gorendu long Rai Kos long sip bilong em Vitaz.

Sir Peter i tok em i bikpela samting long lukim olsem memori bilong Maclay i stap

laip. Na i no bilong ol yangpela pipel i kam bihain long tingim, tasol log luksave long wok em i bin mekim long rekotim histori long ol tumbuna bilong ol Gorendu pipel long ol risets wok em bin mekim long tripela visit o wokabaut bilong em bipo ol lain Gemeni i bin kisim Niugini aninit long lukaut bilong ol.

Sir Peter i tok KPI i bin pablisim ol sampela dairi bilong

Mikloulcho-Maclay log Madang long 1971, tasol moa infomesen i bin kamap long dispela biknem man Rasia.

Na i bikpela samting long ol pipel bilong Madang i lukim na ritim ol dispela metiriel, ol buk, ol filim na ol narapela moa i gat ol wok bilong Mikloulcho-Maclay long Rai Kos, ples i kisim nem bilong em.

Nogat helpim bilong gavman long ol plantesen wokas long Is Nu Briten

Michael Novingu i raitim

NOGAT sapot i kam long gavman long ol woklain ol i kisim ol i kam wok long ol plantesen long Is Nu Briten Provins (ENBP).

Ol dispela plantesen I no wok nau bikos ol i pasim ol pinis, tasol ol i no salim ol woklain i go bek long ples bilong ol .

Olsem na na ol i painim hat na stap long ol dispela plantesen moa long 50 krismas i go pinis.

Mausman bilong ol plantesen woklain asosiesen, Ronnie Koinduo, i tok moa long 3,000 woklain bilong ol plantesen long ENBP i kisim taim no gut na stap yet long plantesen. Na ol i no inap go bek long asples bilong ol .

Koinduo i tok ol dispela lain i stap long plantesen i gat tripela na 4-pela jeneresen nau i stap.

Em i tok ol papa na bubu bilong ol i kisim ol i kam long wok long plantesen tasol ol kampani o plantesen ol i wok long en i no stretim ol long go bek long asples bilong ol taim wok i pinis long plantesen.

Em i tok ol dispela lain i kam wok long ol yia long 1900, na ol i stap yet long Is Nu Briten.

Koinduo i tok ol dispela plantesen i bagarap pinis na i no gat wok long en.

Moa yet, em i tok ol dispela wok lain i no gat gutpela haus slip, wara, lait na ol arapela samting long lukautim sindaun bilong ol.

Potnait pe bilong ol dispela lain em K30.00 long lukautim plantesen tasol, na i no long wok, Koinduo i tok.

Em i tok dispela liklik mani ol i kisim i no inap long lukautim famili bilong ol.

Dispela i mekim tu na planti pikinini bilong ol i no go skul.

Koinduo i tok ol dispela lain nau ol i kolim ol ol waira na tarangu long kantri, na dispela i no stret.

Em i tok ol lain nau i kisim strong long wok gaden long ol plantesen, na salim kaikai long Kokopo maket long helpim sindaun bilong ol.

Em i tok dispela asosiesen iwok long helpim ol na ol i putim nem long Ilektoel Komisen olsem ol manmeri bilong ENBP, na ol i vot long 2007 na 2012 jenerel ileksen.

Koinduo i tok ol i laik traim wokim risetelmen o painim hap bilong ol long sindaun long en, tasol no gat gavman sapot i kam long sindaun ol.

Em i tok asosiesen i laik wok hat na bai ol i kisim luksave na kirapim gutpela sindaun na mekim wok long apim ikonomi bilong ENBP na dispela kantri.

Em i tok nau yet, ol i stap olsem ol kalabus man long ol plantesen ol i stap long en.

Koinduo i tok asosiesen bilong em i no gat inap mani long karimaut wok bilong helpim ol dispela bipo plantesen woklain.

Sampela long ol plantesen we ol lain i stap long en em long Wonga Wonga, Vimy, Baliu, Makaratambu na ol arapela plantesen moa i stap long Is Nu Briten.

Em i tok no gat sapot i kam long gavman long luksave long wok em i mekim long helpim ol dispela bipo woklain bilong plantesen.

Em i singaut long ol lain i gat marimari na gavman tu, long givim helpim long asosiesen bilong em na em bai givim sapot long ol dispela bipo woklain bilong ol plantesen.



Dr. Puka Temu, menba bilong Abau na Minista bilong Pablik Sevis i lonsim nupela straksa bilong olgeta pablik sevan insait long gavman. Nupela Pablik Sevis Manesmen Ekt 2014. Hia em sanap wantaim ol het bilong Dipatmen long dispela bikpela lonsing. Poto: Nicky Bernard

grow business

"A BSP Smart Business Loan helped my small home operation rise to become a Smarter Business."

Ginia Siaguru
Business Owner of Tapioca Delight

320 1212 / 7030 1212 - 24/7

servicebsp@bsp.com.pg

www.bsp.com.pg

Proudly supporting PNG and the Pacific

T.H.E Pati i no go long Palamen sindaun yet

T.H.E Pati lida, Don Polye, wantaim ol pati memba bilong en ino go kisim sia bilong ol yet long flo bilong Palamen long sait bilong Oposisen taim Palamen i bung long dispela wik Tunde.

Praim Minista Peter O'Neill i bin rausim namba tu bikpela kolisin pati long gavman bilong em long Septemba i go long Oposisen.

T.H.E Pati igat 14-pela memba long Palamen na foapelai holim wok minista long kabinet bilong O'Neill.

Wanpela bilong ol em NGI Deputi lida na Deputi Praim


Minista na Gavana bilong Is Nu Briten, Leo Dion.

Lida bilong gavman bisnis James Marape i bin givim notis pinis na opis bilong spika stretim sia bilong ol long sait bilong Oposisen.

Tasol Mista Polye wantaim ol pati memba bilong ol i bin holim miting bilong ol long dispela wik Tunde na i no go long Palmen sindaun, na long Trinde tu ol i no go.

I gat bilip olsem ol i holim miting long strongim ol yet na bai muv i go long Oposisen na Joinim Oposisen lida Belden Namah.

Taim Palamen i bung long



Tunde, ol 4 -pela T.H.E Pati memba husat i holim wok minister olsem Komyuniti Developmen minista na memba bilong Sohe Delialah Gore, Minista bi-

long Fores, Douglas Tomuriesa, Minista bilong Leba na Indastri, Benjamin Poponawa na Deputi Praim Minista Leo Dion i sindaun yet long sait bilong gavman.

Memba bilong Ijivitari, David Arore tu i stap long namel bens.

Ol 4-pela minista i tok ol i lusim pinis T.H.E Pati na joinim narapela pati pinis. Tasol lida bilong ol, Don Polye i tok ol i no bihainim rot bilong lusim pati na joinim narapela pati na ol i memba bilong T.H.E Pati sapos ol i lakim o no gat.



T.H.E Pati lida, Don Polye

T.H.E Pati eksekutiv i tok ol 4-pela minista em ol memba bilong pati yet aninit long loa bilong Poli-

tikel pati na konstitusen bilong pati.

Pati i tok sapos ol i no harim tok, bai patim i ken mekim save long ol long salim komplek i go long Ombusman Komisin.

Sapos olgeta 14 pati memba i joinim, bai em i apim namba bilong Oposisen i go antap long 17.

Oposisen i tok welkam long T.H.E long joinim na kamapim strongpela oposisen, tasol lain bilong Polye i no go insait long Palamen na kisim sia long sait bilong Oposisen yet long Trinde.

Foren kampani bai no nap kisim graun: Allan

OL foren kampani husait i laik mekim bisnis bai no inap kisim graun long kantri aninit long nupela Lens Ekt Rivyu.

Minista bilong Lends na Pisikel Plening, Benny Allan, i tokim Palamen olsem planti graun i wok long lus long pasin korapsen long planti yia, na sampela bilong ol dispela graun i gat komplek olsem ol ausait kampani i bin kisim long pasin korapsen.

Minista Allan i mekim dis-

pela toktok long bekim askim bilong memba bilong Mosbi Not Is, Labi Amaiu, olsem wanpela kampani i kisim graun long ATS setelmen long Mosbi na givim notis pepa long ol pipel i stap long hap long go aut lusim dispela hap.

Mista Amaiu i tok ol sampela kopret kampani long ausait i kam na kisim graun long 8 Mile na AST long Mosbi.

Mista Amaiu i askim Minista bilong Lens long tok klia

long wanem rot dispela kampani i kisim taitel bilong graun.

Em i askim olsem wanem long ol pipel bilong kantri i stap long dispela graun.

Bai gat luksave olsem ol lain i stap long dispela hap graun em ol papagraun na olsem wanem bai yumi larim ol ausait kampani i kam na rausim ol pipel bilong yumi yet.

Mista Allan i tok ATS em olpela egriklasa lis graun na ol pipel i go stap antap. Na

dispela em ol iligel setla long graun bilong gavman.

Tasol Mista Allan i tok dipatmen bilong em i luksave long wanpela kampani nem bilong en Glory Estate i mekim sampela developmen wok long posen 693 long ATS na wok painim bai kamp long wanemrot tru dispela kampani i bihainim long kisim taitel bilong graun.

Mista Allan i tok planti populesen i stap pinis long ol setelmen na em i moa

gutpela long gavman i mekim setelmen i kamap sabab olsem NCD gavana Powes Pakop i laik mekim long 8 mail long NCD olsem wanpela pilot projek.

Em i tok Dipatmen bilong Lens i wanbel long gutpela pen bilong gavana Pakop na i tok dipatmen i sapot dispela.

Mista Allan i tok Lend Dipatmen i gat tingting olsem ATS na ol arapela setelmen bai kamap sabab olsem 8 mail bihain long ol lukim dis-

pela pilot projek i kamap orait.

Lond siapela Mista Allan i tok gavman bai katim graun na givim long ol pipel i ken wokim gutpela haus bilong ol na stap.

Mista Allan i tok i no gat pen long ol ausait kampani i kam insait long kainkain korap rot long kisim graun na gavman aninit long nupela rivyu ekt bai meim save long ol stil pasin bilong graun na ol konman bai kisim bikpela taim.

Ol tisa bai kisim trening long SBE

Stanley Nondol i raitim

MINISTA bilong Edukesen Nick Kuman i tokaut olsem stat long neks yia ol skul long kantri bai yusim olpela Stended Bes Edukesen (SBE) karikulum .

Ol tisa husat i kisim trening long ol koles long taim bilong Autkam Bes Edukesen bai kisim trening bilong SBE.

Minista Kuman i givim tok save nipa na olgeta tisa koles long kantri bai yusim SBE long trenim ol tisa stat long neks yia. Na ol i tisa kisim trening long OBE bai kisim ol trening long Insevis Koles long Mosbi long SBE.

Mista Kuman i tok dispela trening bilong SBE bilong rausim OBE i aut long edukesen sistem bilong kantri bai kisim olsem 5-pela yia.



Minista bilong Edukesen, Nick Kuman

Mista Kuman i tok OBE i no wok gut long kantri na dispela i kisim edukesen sistem i go bek olgeta bikos ol idia em bilong ol narapela lain na i no wok gut long edukesen sistem bilong PNG.

"OBE bai go aut long

edukesen sistem bilong kantri long 2019. Stat long neks yia bai yumi isi isi rausim inap olgeta tisa i kisim save bilong SBE".

"Dispela em i dreksen bilong gavman long 2011 na dipatmen i nau stat long mekim wok long rausim OBE bihain long Nesenel Eksekutiv Kaunsil i tok orait,"Mista Kuman i tok.

Mista Kuman i mekim dispela toktok bihain long memba bilong Nuku, Joe Sungi i askim em long tok klia wanem taim bai edukesen dipatmen i mekim awenes long ol tisa long yusim SBE bikos planti elementeri tisa i wok long kisim trening long distrik bilong em.

Mista Sungi i askim tu olsem planti ol elementeri tisa long kantri i kisim trening long lamap tisa pinis na

ol bai go wok long wanem hap long neks yia bikos OBE i aut na SBE bai kisim ples. Ol bai no gat wok moa.

Mista Kuman i tok dipatmen bilong em putim bikpela toksave long nius-peapa pinis long dispela na stat long Novemba bai bikpela awanes i kamap long dispela na long dispela taim bai kamap ples klia wanem hap ol elementeri tisa bai go .

Minista Kuman i tok dipatmen bilong edukesen tokim pinis olgeta tisa koles long yusim SBE long neks yia na sampela sumatin stap fes yia bai kisim seken yia stadi long SBE na bihain bai ol go kisim moa trening long SBE.

Mista Kuman i tok dipatmen sekreteri i wok long program bilong trening na dipatmen bai stat yusim long neks yia.

PNG gavman i mas strongim sekyuriti long Indonesia boda

MAN husat i go pas long lukautim sekyuriti long Western Provins boda wantaim Indonesia long West Papua i tokaut strong long sait long sekyuriti long hap.

Superintenden Sika i tok Papua New Guinea gavman i mas strongim ol wok sekyuriti long ol bodamak wantaim Australia na Indonesia sapos emi laik lukautim gut nesanel na fud sekyuriti bilong en.

Superintenden Sika i mekim dispela askim bihain long Australia polis i bin stopim wanpela bikpela wok bilong bringim na salim hait

ol drag na gan namel long Papua New Guinea na Australia i no long taim i go pinis.

Ol i tok mak bilong mani bilong ol dispela drag na gun i stap olsem \$2.5 milien long mani bilong Australia.

Ol polis bilong Australia i tok ol i pulim na kalabusim sampela man na meri long bringim hait ol dispela drag na bai ol i go het yet wan taim dispela wok long ol.

Tasol long PNG, Suprintenden Sika i tok ol i no save mekim gut wok bilong ol long wanem, ol i no gat sapot ikam long nasenal gavman.

PNG polis i toktok long Pasifik Gems

PAPUA New Guinea polis i laik olgeta samting i go gutpela long sait long sekyuriti long Pasifik Games we PNG bai lukautim.

Andy Bawa, Metropolitan Polis Suprintenden bilong long NCD i mekim pinis bikpela askim i go long ol pipel long siti long wok bung wantaim long lukautim na kamapim gutpela Pasifik Games long yia bihain.

Suprintenden Bawa i mekim despela toktok taim kantri i gat klostu 10-pela mun i stap bilong redim gut olgeta samting long 2015

Pacifik Game em bai kamap long mun Julai long Mosbi.

i luk olsem planti samting i wok long go het gut, tasol i gat sampela i wok long wari yet long lo na oda.

Olgeta kantri long rijon wantaim tu Australia na Nu Sila bai stap long ol dispela pilai.

Superintenden Bawa i tok ol polis i wok long redi gut long sait long sekyuriti long ol pilai, tasol ol i laikim komyuniti tu i helpim long lukim olsem olgeta samting i go orait long taim bilong Pasifik Gems.

Bisnis long Manus i stap long pret

Stanley Nondol i raitim

OL papagraun bisnis long Manus provins i stap long bikpela pret bikos ol kampani long ovasis i kam pinis wantaim ol masin, kar na ol samting bilong wok na singaut long kisim ol bisnis we wok i kamap aninit long Asailam Sika agrimen.

Memba bilong Manus Ronney Knight i tokim palamen olsem ol spin of bisnis

long MAanus i bai go long ol Australia bikos Australia dipatmen bilong imagresen na Boda proteksen i tok ol i kiism ol masin na kar bilong wok i kam pinis.

Mista Knight i tok ol i tokim ol liklik bisnis long Manus olsem gavman bilong Australia i no moa nidim sevis bilong ol.

Mista Knight i askim Minista bilong Foren Afeas, Rimbink Pato sapos em i

ken stopim Dipatmen bilong Imagresen na Boda Proteksen long Australia bikos planti pipel long Manus bai lusim bisnis.

"Ol haia kar bisnis, na sampela spin of bisnis bai lusim wok bikos PNG i no kontrolim dispela mani ol narapela lain i kontrolim", em i tok

Mista Knight i tok PNG na Australia gavman i mas wok aninit long ol agrimen

bilong Asailam Sika bikos ol pipel bilong Manus i no kisim inap sevis long agrimen bilong Asailam Sika.

Minista Pato i tok dispela hevi em i tru, dipatmen bilong em i save long dispela.

Em i tok PNG na Australia gavman i toktok namel long tupela long ol planti hevi bilong Manus na dispela em i wanpela bilong ol toktok. **Poto: Piksa**

O.R.S long Bogenvil i stat long dispela wik



Traipela sip we ol ami bilong Australia bai yusim long Operesen Renda Seif long Torokina, Bogenvil.

OPERESEN Renda Seif (ORS) long Torokina long Saut Wes Bogenvil i stat long dispela wik na bai pinis long namba 8 de bilong mun Novemba.

Ol lain husat bai go pas long dispela operesen em ol ami bilong Australia. Ol ami bilong ol Australia i bin kisim tok orait long Atonomas Rijon ov Bogenvil, na Gavman bilong Papua Niugini long go pas long dispela operesen.

ORS em wanpela bikpela

projek we i lukim ol ami bilong Australia i rausim ol bom na gan bilong bipo long taim bilong Wol Woa. Ol dispela bom na gan i ektiv yet, na i save bagarapim sindaun bilong ol manmeri. Sampela manmeri i dai pinis bikos long ol dispela bom na gan.

Dispela operesen i kam aninit long bikpela program we gavman bilong Australia i kamapim long rausim olgeta olpela bom na gan long ol kantri long Saut Pasifik rijon.

Ol bom na gan ol i rausim i save go long ol bikpela musiem long Australia we ol i save lukautim gut na stap.

ORS i bin kamap pinis long ol ples long Solomon Ailan na long Rabaul long Is Nu Briten Provins.

Long ORS bilong dispela yia long Torokina, 500 opisa husat i gat bikpela save long rausim ol dispela bom na gan bai wok. Ol dispela lain i no bilong Australia tasol, sampela bilong Nu Silan, Solomon Ailan, Canada, USA, UK na Tonga.

Ol bai yusim ol bikpela masin long karim aut dispela ORS long Torokina, na ol medikal lain bai stap tu na putim was long helpim sapos wanpela i kisim bagarap long taim bilong wok.

Komanda bilong ORS 2014, Jay Bannister, i tok olgeta memba i redi long wok.

Komanda Bannister i tok ol bin yusim bikpela taim long mekim plen bilong mekim dispela operesen, na em i gat strongpela bilip olsem olgeta wok bai ran gut.

Plening bilong dispela operesen i lukim planti bikpela oge-naisesen i wok bung long lukim olsem olgeta samting bai ran stret. Ol dispela bikpela oge-naisesen em Australia Difens Fos, Dipatmen ov Foren Afeas na Treid, na Australia Hai Komisen.

Em i tok ol pipel bilong ol komyuniti long Torokina na Bogenvil Polis Sevis i givim gutpela sevis long helpim ol ami bilong Australia long painim ol hap we i gat ol bom na gan.

"Bogenvil Polis Sevis i mekim bikpela wok tru long kamapim awenes na toksave long ol manmeri long ol komyuniti long Torokina long dispela bikpela operesen," Komanda Bannister i tok.

Em i tok ol polis bai wok yet long lukim olsem olgeta manmeri long ol komyuniti long Torokina i stap gut na seif long taim bilong dispela operesen.

Long Torokina distrik i gat planti bom na gan bilong bipo i stap long graun, ples, haus, skul, na long ol gaden.

Long taim bilong Wol Woa 2, Torokina em wanpela hap we ol ami bilong Japan i bin pait wantaim ol ami bilong Australia na Amerika.

Mekim wok bilong bikpela

Isaac Liri i raitim
LONG Sios ov Jisas Kraist ov Leta De Seints (Momon), ol yangpela man na meri i save givim sevis bilong ol i go long God papa taim ol i go long mekim miseneri wok inap long

tupela yia. Long taim ol i stap olsem miseneri, ol i no save stap wantaim famili bilong ol. Ol i save stap aninit long lukaut bilong sios na mekim gut wok bilong bikpela. Sampela taim ol i

save bungim taim nogut long taim ol i wokim misineri wok. Tasol ol i save olsem bikman bai lukautim ol, na ol i save go het long karim tok bilong em i go long ol pipel we pasin bilong graun i save pasim ai bilong ol long lukim gutpela rot.



Ol Momon Miseneri long Rabaul, Is Nu Briten Provins.

Planti sans bilong ol yangpela long Manus long skul

GAVMAN bilong Australia i mekim planti samting long helpim laip bilong ol manmeri long Manus Provins. Long ol ripot i kam long Australia Hai Komisen long Pot Mosbi, ol yangpela long Manus i bin gat sans long harim tok bilong Australia Hai Komisen long mun Julai long dispela yia, na kisim sampela bilong ol skolasip we Australia i givim. Nau yet long dispela taim, 11-pela manmeri bilong Manus i kisim ol



Ol yangpela bilong Papitalai Sekenderi Skul. dispela skolasip bilong Australia. Dispela skolasip em ol i kolim Australia Awods Skolasip, na em wanpela rot we Australia i kamap wantaim long wok bung wantaim Papua Niugini na ol pipel long Manus provins. Ol opisa bilong Australia Awods Skolasip bai raun i go long Manus gen long pinis bilong dispela mun.

Australia helpim Manus stretim ol rot na bris

AUSTRALIA i givim mani long kamapim 4-pela nupela rot na bris projek long Manus Provins.

Mani mak we Australia bai yusim long kamapim ol dispela rot na bris em K30 milien.

Australia i wok bung wantaim Dipatmen ov Woks na Manus Provinsal Gavman long kamapim ol dispela projek we bai stat long neks mun Novemba.

Ol dispela projek bai lukim ol kontrakta i stretim Momote rot, ol rot na baret klostu long Lorengau maket, Lonis bris, na Nuwok bris.

Nupela Gerehu Maket i op

OL maket lain bilong Gerehu maket na ol lain husat i save go baim samting long hap i bin amamas na selebretim de bilong opim nupela seif na klin maket wantaim NCDC Gavana na UN Wimen longFonde.

NCDC i bin save stretim hap bilong maket long planti yia i go pinis, UN Wimen na Nesenwaide Maikrobenk i mekim maket i kamap seif, klin na givim spes bilong olgeta lain i ken salim samting bilong maket. UN Wimen, Kantri Representativ, Dokta, Jeffrey Buchanan i bilip olsem siti maket i nambawan long strongim wok bilong ol meri insait long komyuniti.

"Ol maket i save helpim ol meri long lukautim ol liklik bisnis, painim mani bilong famili bilong ol, sevim mani na helpim ikonomi bilong kantri long gro.

UN Wimen i sapotim ol meri i save wok hat long salim samting long ol maket bilong siti, long ol i mas gat seif hap long stap isi na painim mani bilong ol na long go baim kaikai samting long ol bikpela stua,"Mista Buchanan i tok.

Wantaim ol narapela senis i kamap insait long maket, wanpela bikpela samting i stap ples klia tru em long Nesenwaid Maikrobenk MiCash mobail walet. MiCash i save helpim ol

lain i salim kaikai samting long peim maket fi bilong ol wantaim mobail wallet. Dispela stail em bilong helpim long daunim pasin bilong stil i save kamap long ol lain i salim kaikai, planti taim bipo. Mobail wallet em i helpim tu NCDC longkisim takis bilong maket spes, we pastaim ol i no save putim long benk akaun bilong NCDC olgeta taim.

Pot Mosbi Seif Siti Program wantaim sapot bilong UN Wimen Seif Siti, i no gat Vailens long ol Mama na Yangpela meriGlobal Inisitiv. Pot Mosbi i kisim nem pinis olsem e mi wanpela bilong ol 5-pela siti long wol long lukim wanpela paillet projek.

Ol i makim Pot Mosbi olsem wanpela bilong ol 5-pela siti long global paillet inisitiv wantaim Quito long Ecuador, Kigali long Rwanda, Cairo long Egypt ns New Delhi long India.

NCD Siti Menesa, Leslie Alu i soim amamas bilong em long Pot Mosbi is tap insait long global insitiv program na i laik lukim moa projek long Pot Mosbi bai kamap bihain.

"Gerehu em i namba wan paillet projek bilong mipela na bihain long dispela bai mipela i wok long stretim Gordons maket long yia bihain," Mista Alu it ok.

"NCDC i gat bikpela tingting long makim ol maket bilong siti

seif na ikonomik spes bilong olgeta lain i salim samting long maket o long infomol ikonomi," e mi tok.

Wok long Gerehu Maket i bin stat long 2011, taim NCDC na UN Wimen i stat long mekim sampela senis long menesmen na operesen long maket bai i gat ol polis long ples klia long stopim ol pasin bilong bikhet i save kamap long maket ples.

Long 2012 namba wan wok bilong stretim Gerehu maket i bin kamap. Ol Toilet, baret, wara tep na ol narapela bikpela samting i bin kamap.

Minista bilong Helt, HIV/AIDS na Memba bilong Mosbi Notwes, Michael Malabag na Gavana Powes Parkop, i bungim mani long putim wanpela ples bilong ol pikinini long pilai graun na long putim simen bilong maket. Namba tu na las wok i bin kamap long stat bilong yia 2014.

Tupela nupela haus i bin sanap long kamapim moa spes bilong maket lain i salim kaikai na long putim haus antap long pilai graun.

Ol developmen patna bilong Gerehu Maket ridvelopmen em Australia na Nu Silan gavman, husat i wok wantaim ol patna bilong Nesenel Kepital Distrik (NCDC), UN Wimen, Nesenwaid Maikrobenk na Royol Papua Niugini Konstebuleri.



PIH Saveman Nius

"I kam long Pacific International Hospital Port Moresby"

Ph: (675) 323 4400 Fax: (675) 323 4600 Website: www.pih.com.pg

Laipstail Sik- Daiabitis bagarapim helt bilong maus

Daiabitis i bagarapim planti milien pipel long wan wan ya. Sapos yu bin kisim wanpela tok-save long dokta olsem yu gat daiabitis, yu ken save olsem dispela sik i ken bagarapim ai bilong yu, ol bodi bilong yu, nevs, kidni na hat bilong yu. Sik daiabitis i ken daunim strong bilong bodi bilong yu long pait wantaim binatang bilong sik na i ken pasim rot bilong yu winim sik hariap.

Daiabitis i save bagarapim maus olsem wanem?

Ol pipel husat i gat daiabitis i stap long rot no gut long ol i ken kisim sua long gam long maus na tu long bun bilong wisket we i save holim tit. Sik ol i kolim periodontel em i sik bilong gam.

Periodontel i ken kamapim bikpela pen long gam na mekim hat long kaikai gut na tu mekim tit long pundaun. Maus i drai planti taim i save soim sain bilong daiabitis, na em i ken kamapim sua long maus, na bagarap long tit o tit bai i sting. Smuk, dring bia na kaikai buai i save mekim dispela sik i go

bikpela moa.

Taim yu no stopim hevi bilong daiabitis gut, bikpela suga bai kamap long spet na bai helpim binatang no gut long gro.

Pipia long maus o tit we yu no rausim hariap i ken kamap strong antap long tit na mekim tit i sting (tartar). Taim strongpela tartar i kamap, gam bilong yu i ken solap na ret.

Taim daiabitis i rausim sampela strong bilong bodi long sakim sik, gam long tit em i wanpela isi hap bilong bodi long kisim sik hariap.

Ol siklain husat i no gat inap blut long strongim wok bilong suga long bodi, i save hariap long kisim sik peridontel, na ol tit bilong ol i save lus tasol ol narapela lain i gat sik daiabitis na i lukautim gut bodi bilong ol bai i no kisim dispela sik.

Sapos yu gat sik daiabitis bai dispela kain hevi kamap long maus:

Tit bai i sting

Gam i solap na sua kamap

Hap bilong kamapim spet long maus i no wok gut

Sampela sik long skin bai kamap

Lichen planus na lichenoid sik (solap long

maus bai kamapim ol waitpela samting long tit)

Kisim sik na i no orait hariap.

Pasin bilong pilim test bilong kaikai i bagarap

Maus i smel no gut

Lukim dentis bilong yu hariap tasol sapos yu lukim sampela bilong dispela kain samting:

Blut kamap long gam hariap

Gam bilong yu i kamap ret na i solap.

Ol gam i tekewe long tit

Susu no gut i kamap namel long tit na gam taim yu bengim gam

Planti taim maus i smel na i mekim hat long pilim tes bilong kaikai.

Ol tit bai pundaun o bikpela spes kamap long namel

Taim yu kaikai na tit bilong yu i no kam bung gut

Sampela giaman tit i no sindaun gut.

LUKAUTIM TIT BILONG YU

Long lukautim helt bilong maus, yu mas givim taim long dentis i klinim tit bilong yu long opis bilong em, na yu mas was gut long no ken larim periodontel sik na ol narapela sik long kamap bikpela long maus na tit.

Yu mas go sekim tit

wantaim dentis planti taim, bilong wanem em bai lukautim helt bilong maus bilong yu na i ken givim yu marasin, na helpim tit na maus bilong yu hariap sapos em i lukim olsem i gat sain bilong sik i stap.

Sampela taim bai dentis bilong yu i tok long yu mas go kam long sekim tit moa long em bai klinim tit bilong yu wantaim marasin, long holim gutpela helt long maus.

Klinim na lukautim gut maus em i namba wan.

Bihainim gutpela pasin bilong lukautim tit na maus long haus yet, bihainim toktok bilong dokta bilong yu long wanem kain kaikai yu mas kaikai, na ol marasin yu mas kisim, na makim taim long go long dentis long sekap. Dispela bai helpim yu long i gat gutpela tit long givim smail olgeta taim.

Mi bilip olsem toksave long dispela pepa i helpim yu.

Tasol sapos yu gat moa askim na i laik save moa plis ringim mi long telepon 311 3000.

Nem bilong PIH dentol sejen: Dr Jagadeesh Ebenezer, MDS.

FRI SEJERI!

PIH bai bringim tripela sejen (dokta bilong katim man) bilong USA i kam long stretim sik bilong maus na nek i op (cleft palate) long mun Disemba. Teksim nem bilong siklain famili o pren bilong yu wantaim wanem hap yu stap long en, i kam long digicel # 7155-8866 long rejista.

SEKIM DAIABITIS LONG OL SIK LAIN

Namba wan tes long sekim sik daiabitis olsem wanpela "Fasting blood glucose".

Sapos tes i soim, sampela sain bai dokta i tokim yu long mekim moa tes.

"Glucose Tolerance Test" em i wanpela rot bilong painimaut moa na save tru olsem sik Daiabitis i stap long wanpela man o meri.

"HbA1c" tes em i ken sekim mak bilong suga long blut bilong yumi insait long 3-pela mun.

Em i ken sekim tu pispis long lukim sapos i gat "proteinuria", i stap sapos i gat bagarap i kamap long kidni.

"Urine Microalbumin" em i nupela tes long luk-save long sik long kidni na em i gutpela tru long lukim bagarap long kidni we i save kamap long kain kain sik olsem Daiabitis.

Ol narapela leboretri tes i gutpela long sekim yet daiabitis em "Creatinine, Cystatin C, Urea, Electrolytes, Lipid Profile and SGPT".

Ol dispela sevis i stap long PIH!

Oktober em I mun bilong 'Wol Sait De' o 'De bilong tingim Ai', na long dispela mun Oktober Ai Kea long Pot Mosbi bai givim spesol ofa.

Long dispela mun Oktober yu kam na lukim dokta na baim ai glas bilong yu long 15% (pesen) diskaun!!



Yu Katim dispela hap pepa na kisim wantaim yu i kam long lukim dokta.



Pacific International Hospital

delivering advanced healthcare

Eye Care locations in Port Moresby:

- Waterfront Food World, Harbour City Pom, Ph: 320 1991
- Vision City Mega Mall, Shop No F5, level 1, Waigani Pom, Ph: 310 0484
- Steamships Plaza, Shop No 29, Down Town, Pom, Ph: 320 3338

Pacific International Hospital:

4-mile (Boroko bus stop) - 323 4400, Specialty Clinic (3-mile) 311 3000 and Vision City - 310 0485 Website: www.pih.com.pg
Text line (for SMS inquiries ONLY) - 7155 8866

US Sapotim Meri long wok bilong belisi na sekyuriti long Bogenvil

YUNAITED Stet (US) i helpim ol Bogenvil meri long kamapim gutpela sindaun wantaim pis na sekyuriti.

US Embesi i tokaut long 4-pela gren awod long mak bilong K2.5 milien i go long ol ogenaisesen bilong ol meri long as ples. Dispela gren mani em i wanpela hap bilong USAID Wimen Pis Bilding Inisitiv (WPBI) we ol Kauntapat Intenesenel (CI) i wokim na i save kamap long olgeta tupela yia.

Ol projek i wok wantaim sivel so-saiti ogenaisesen long Atonomas Rijon bilong Bogenvil (ARB) long kirapim tingting bilong ol meri na mekim ol i luksave moa long ol rait bilong ol; givim tritmen na kaunseling long ol ex-kombaten na ol sivilien; na givim sapot long ol lain husat i kamaut long hevi bilong jenda bes vailens.

Ol i givim ol mentoring sapot long komyuniti helt woka long riferol bilong mental helt na tritmen bilong ol, redio program long ol rait bilong meri na wok bilong jenda long Bogenvil, trening na awenes bilong ol man, meri na yut, ol komyuniti lida, long taget jenda bes vailens komyuniti awenes ektiviti, na developmen trening skil bilong ol meri long jenda,



Ol lain lida bilong Bogenvil komyuniti husat i kisim gren long USAID.

“Ol meri i save long kamapim pis, komyuniti lida, na sempion bilong lida na human rait. Mipela i amamas long wok wantaim ol, ARB gavman na ol arapela developmen patna.” U.S. Embeseda, Walter North i tok.

Ol lain i kisim gren em ol memba

bilong Bogenvil Wimen Federesen long Not Bogenvil; Tunaniya Open Lening Senta long Sentral Bogenvil; Famili Sapot Senta bilong Buka Jenerol Haus sik,

Famili Sapot Senta na Leitana Nehan Wimen Developmen Ejensi, tupela wantaim i stap long Bogenvil.

“Ol dispela gren i helpim ol lida na komyuniti moa long wanem kain hevi i stap long sik bilong tingting na bikpela wari long ol pipel bilong Bogenvil na wanem mipela i ken mekim long helpim ol,” Sista Essah Barnabas, Kodineta bilong Famili Sapot Senta (FSC) i tok.

Wantaim WPBI projek, USAID na CI i kamapim pasin bilong wok long wantaim planti stekholda olsem, ABG Divisen bilong Komyuniti Developmen; ol Meri, Pis, na Sekyuriti Teknikol Wok Grup; Famili na Seksual Vailens Teknikol Wok Grup; na Mentol Helt Stia grup.

Bikman i trastim mi na mi trastim em ...Pater Paul i tok

Nicky Bernard i raitim

PATER Paul Liwun em i bilong Flores Ailan, wanpela liklik ailan long Indonesia.

Taim em i pinisim olgeta skul bilong em, tingting bilong kamap pater i stap strong long het bilong em olsem na em go skul gen long kamap wanpela pater.

Taim em i pinisim skul long kamap pater wantaim ol wan skul bilong em, ol i bin makim Fr Paul long kam long Papua Niugini long 11 de bilong Mun Oktoba long 1990. Taim Fr Paul kam pundaun long Mosbi em kisim narapela balus na go stret long Madang Diwain Wod long lainim Tok Pisin.

Fr Paul i bin stap wanpela yia olgeta long lainim Tok Pisin na long pinis bilong 1990, Supiria bilong ol SVD i bin makim em long go antap long Wabag long karim aut wok pater. Long dispela taim nau, Tok Pisin i kilim em stret.

Long Wabag, Fr Paul i stap 9-pela krismas olgeta long mekim wok bilong em olsem pater na long bringim ol manmeri long kam klostu long Papa God. Planti ol manmeri na pikinini long Wabag i save gut tru long Fr Paul taim em raun long taun.

Fr Paul i lusim Wabag long pinis bilong 1997 na kisim nupela wok ples long kam long Mosbi long wok pater long St Peter Channel long Erima long 1998. Taim ol bikman

bilong Katolik Sios i askim em long kam long Erima, em bin pret liklik na les long wanem, Erima na Gordons i gat ol stori no gut na bik het pasin i pulap.

Tasol Fr Paul i tingim promis bilong em na wanpela tingting i save stap strong tru long het bilong em olsem. “God i trastim mi na mi mas gat trast long em (God)”, Fr Paul i tok.

Dispela tingting bilong em i kisim em long 1998 kam long Erima long statim wok misinari bilong em.

Taim Fr Paul i statim namba wan misa bilong em long St Peter Channel, dispela haus lotu bin pulap long wanem ol pipel long Erima, Gordons, Waillaip na sampela liklik long 5 na 6 mail bin kam long lukim nupela pater bilong ol.

Dispela taim nau Fr Paul i stat long bungim ol nupela poro man na ol nupela famili long Erima, Gordons, Waillaip na sampela tu long 8-mail. Yia i wok long lus na planti manmeri na pikinini i wok long kam lotu long St Peter Channel na dispela haus lotu i wok long go liklik.

Fr i statim wanpela fanresing komiti long kamapim mani long mekim dispela haus lotu i go bikpela. Dispela hat wok bilong em na ol komiti bilong karim kaikai na ol mekim dispela haus lotu i go bikpela.

Long 2010, Fr Paul i lusim Erima na kisim nupela posting long go long bikpela ples Hanuabada insait long NCD.



PATER Paul Liwun i givim komunion long ol pikinini long parish bilong em long Hanubada viles long NCD.

Planti manmeri na pikinini long Erima, Gordons, 8-Mail, Waillaip na 5na6 bin pilim pen long lewa bilong ol long wanem Fr Paul bin stap wantaim ol 13-pela krismas olgeta na i mekim planti senis long laip bilong ol, haus bilong ol na liklik ples ol stap long en.

Fr Paul tu i wari long lusim ol tasol em singaut bilong Papa God na ol Katolik Sios long salim em i go daun.

Fr Paul i stap long Hanuabada long 4-pela krismas nau, taim em go daun tasol long wok long ples Hanuabada tupela krismas tasol na em i laik lusim tasol dispela tingting i kam bek long het bilong em olsem sapos “God trastim mi, mi mas trastim God long mekim gut wok bilong mi” Fr Paul i tok.

Dispela yia Fr Paul i amamasim 25 yia Silva Jubili bilong em long

wok olsem pater, na dispela 25 yia bilong em olsem pater i mekim long Papua Niugini tasol.

Long las wik Fr Paul i go bek long Erima long mekim lotu wantaim ol poro manmeri na famili bilong em long amamasim dispela Silva Jubili bilong em.

Dispela tupela misa haus lotu bin pulap long ol poro manmeri na famili husat em bin stap wantaim ol 13-pela krismas. Taim lotu pinis ol mekim liklik kaikai long tingim dispela 25 yia bilong em olsem pater.

Fr Paul bai go malolo long ples bilong em long Istimo long Indonesia na bung wantaim ol brata susa bilong em long tripela mun na bihain bai em kam bek long nupela yia 2015 long mekim sem wok bilong em olsem pater.

Wantok Niuspepa bin askim Fr Paul olsem bai em lusim dispela

wok bilong em tasol em bekim olsem.

“Taim papa bilong mi i laik dai em mekim ol las toktok bilong em na mi no bin stap na em tokim brata susa bilong mi olsem Polu wok yet, na ol brata susa i tok yes em wok pater yet, na papa bilong em tokim ol brata susa olsem, tokim Polu (Fr Paul) olsem em mas wokim gutpela wok bilong pater inap em dai”. Fr Paul tokim *Wantok Niuspepa*.

Olsem na Fr Paul bai bihain promis bilong papa bilong em long stap Pater yet inap sampela taim bihain long tingting bilong em long mekim narapela wok gen.

Gutpela wok Fr Paul Liwun, *Wantok Niuspepa* tok amamas long bikpela wok yu mekim long ol manmeri bilong Papua Niugini long 25 yia.

Biknem lida wantaim visen i dai



GOUGH WHITLAM:

Long dispela wik Tunde, Australia i lusim wanpela biknem lida, Leba Pati lida long Australia na pastaim praim minista.

Gough Whitlam i gat 98 krismas na em i dai long dispela wik Tunde.

Ol senia politisen long Palamen bilong Australia i sori tru na tok dispela em "lida i gat visen na i wanpela "giant" i bin mekim planti gutpela wok long kantri taim em i praim minista na tu, long ol wok bilong em.

Oposisen lida, Bill Shorten, we pati bilong em i stap long haus kraik long lusim biknem lida bilong ol i tok "Australia i lusim wanpela long ol biknem pikinini bilong em.

"Mi bilip olsem moa pipel i kraik long Gough Whitlam, winim ol narapela politikel lida long histori bilong Australia," Mista Shorten i tok.

"Lait bilong Gough bai sain moa yet na ol memori long ol gutpela wok em bin mekim bai stap longpela taim long lewa bilong ol pipel long dispela kantri," Mista Shorten i tok.

Em i tok Gough Whitlam i mekim ol nupela senis long Australia winim ol narapela lida pastaim o bihain long em.

Praim Minista, Tony Abbott, i bin tokim Palamen olsem tripela yia Gough Whitlam' i bin praim minister na go pas, em i bin senisim Australia na kamapim rot long ol samting kantri i bihainim tude.

"Long laip bilong em, em i gat as o samting long mekim na karim kaikai. Ol man i ken mekim samting i kamap long kantri ol i laikim. Yumi gat planti samting long lainim long ol "giant" bilong dispela taim," Mista Abbott i tok.



Olpela praim minista Gough Whitlam long bipo days wantaim ol asples Aborijin pipel ..

Yangpela Jihad teroris bilong Australia tok lukaut



Jihad IS teroris yangpela bilong Australia, Abdullah Elmir..

Jihad IS teroris yangpela bilong Australia, Abdullah Elmir i kolim nem bilong Tony Abbott, toktok long kilim dai ol man na autim ol strongpela tok lukaut olsem grup bilong en bai skruim pait i go het yet.

Strongpela singaut i go long Gavman bilong Australia long mekim samting hariap long long daunim ol hevi na trabel we ol Islamik Stet (IS) teroris i laik kamapim long Australia. Dispela i bihainim wanpela video i kamaut tasol we i soim Abdullah Elmir, em wanpela yangpela mangki Australia i gat 17 krismas i tokim Praim Minista bilong Australia Tony Abbott olsem ol teroris grup i no inap stop long pait.

Samting olsem 2200 Federel Palamen memba long Australia i lukim dispela video i tok samting ya i laik mekim blut bilong man i kamaut na i no gut tru.

Ol Muslim grup long Australia i egensim dispela video na ol i wari olsem dispela bai kirapim bel no gut, wari na hevi insait long ol komyuniti long Australia. Sampela i kirap no gut na ol i askim olsem wanem na dispela i kamap long pikinini i groap long Australia.

Greens Pati lida, Christine Milne i tok dispela video i wanpela tok lukaut olsem ol i bin ting bai kamap long Australia sapos Australia i bihainim Amerika long narapela woa long Midel Is. Em i tok em i no kamapim hevi tasol long Australia, tasol ol Jihad militens i ken yusim long rikrutim ol yangpela lain Australia long grup bilong ol.

8-pela Muslim ogenaisesen i bin autim wanpela pres stemen o toktok egensim dispela video.

Sampela ol toktok we mangki i mekim em, "Long ol lida, long Obama, long Tony

Abbott, mi gat dispela toktok long mekim. Ol samting bilong pait mipela i gat, ol soldia, mipela i no inap stop long pait, mipela i no nap putim daun ol gan samting inap mipela i kamap long graun bilong yupela inap mipela i kisim het bilong ol lain i laik fos na bosim olgeta lain na inap blekpela fleg bilong mipela i plai antap long olgeta graun," yanpela Abdullah Elmir i tok.

Em i tok IS bai pait inap blekpela fleg i plai antap long Buckingham Pales (Ples bilong Kwin na Royel Famili) na White Haus (Palamen bilong Amerika). "Kisim olgeta kantri long kam pait wantaim mipela, mipela i no wari. Maski 50 o 50,000 kantri, mipela i no wari.

"Kisim ol balus na olgeta samting bikos ol dispela i no nap bagarapim mipela long wanem, mipela i gat Allah wantaim mipela," yanpela Abdullah Elmir i tok olsem long video.


Oscar Pistorius kalabus

Oscar Pistorius i gat 27 krismas em dispela disebel tasol i wanpela top etlit na Olimpik Gol medal wina long dispela wik kot i wokim disisen long salim em i go kalabus long 7-pela yia long kilim dai gelpren bilong em, Reeva Steenkamp i gat 29 krismas, long las yia.

Long dispela wik Tunde, Kot i salim Pistorie i go long 5-pela yia kalabus long Kgosi Mampuru haus kalabus long Pritoria, Saut Afrika. Em i kamap wanpela long ol 7,000 kalabus lain long dispela haus kalabus.

Longpela kotkes i bin ran long 7-pela mun bin kamap na Pistorius i tok tru, em i bin sutim gelpren bilong em, tasol em bin ting olsem em i wanpela raskol o lain i laik brukim haus bilog em.

Kain ples olsem haus kalabus Pritorius i stap long en nau i narakain long gutpela



Bipo taim, Oscar wantaim gelpren bilong em, Reeva Steenkamp.

laipstail em i gat na i save long en we i gat ol stail na naispela samting, ol nais-

pela meri na ol stail na fas kar.

Olpela matmat painim ol nupela piksa

Olpela matmat long Greece painim ol nupela piksa long taim bilong Alexander the Great.

Ol akiolojjs o ol man i save digim graun long painim ol samting i kamap long taim bipo i digim na painim wanpela olpela matmat i gat ol droing na stetyu i kamap long senseri 4, long taim bilong Alexander the Great. Bikpela bilong ol droing na stetyu em 4.5 mita na 3 mita we ol akiolojjs i painim long wanpela olpela matmat long Amphipolis, wanpela taun long Not Greece. Ol i bilip olsem piksa ya i gat stori bilong Persephone em pikinini bilong Zeus em Godess bilong



andawol husat ol i bin kidnepim em, olsem i stap long ol tumbuna stori bilong Greece.

Ol i ting olsem matmat ya em ol i planim Roxana em meri Persia bilong Alexander the Great o mama bilong em Olimpias, tasol ol akiolojjs na ol save-man i wok long glasim yet ol samting. Matmat i gat tripela semba na ol i no digim yet narapela tupela.

EBOLA em i wanem kain sik?

Dokta Peter Korimbo – Ophthalmologist i putim dispela toksave.

EBOLA em i wanpela varies o binatang i save birua long blut sistem bilong ol man.

Ol saientis i save kolim hemorrhagic fiva na em i save mekim ol bodi bilong ol lain i rausim blut na planti taim ol i save lusim blut inap ol i dai.

Wantok Niuspepa i bin tokaut long dispela sik long mun Ogas long namba 2084 pinis tasol dispela sik nau i go bikpela moa yet long Afrika na i kalap i go long Amerika na Yurop. Olsem na mipela i putim gen dispela stori wantaim toksave i kam long Dokta Peter Korimbo.

Ebola em i isi tru long

kalap i go long narapela man o meri. Em i save ran long blut, maus wara, na wara long taim man i slip wantaim meri na ol narapela wara i kamaut long bodi bilong man.

Ebola varies i no save raun long win bai yu kisim nating. Tasol em i no gut tru long wanem man i no inap stap laip wantaim dispela vaires. I gat 90% pesen bilong ol lain i kisim dispela sik i dai. Em i wanpela sik i save kamapim bikpela dai long wol na em i nap kilim man insait long sotpela taim tasol.

Ebola i no gat marasin bilong en. Ol dokta i save traime tasol long givim wanem kain marasin bihainim sain bilong sik tasol ol i givim nating na bilip long ol siklain bai orait gen.

Bai yu save sapos wanpela man i kisim sik Ebola olsem; em i gat fiva o skin hat, het i pen, dairia, traut, bodi i no gat strong, join na masol bilong em i pen, bel i pen, lusim kaikai.

Yu lukautim yu yet long sik Ebola olsem; wasim han wantaim sop olgeta taim na yu ken yusim wanpela wara sop bilong wasim han, no ken raun nating long hap we bai yu pas wantaim planti lain. Yu mas kaikai long haus bilong yu yet tasol. Yusim ol marasin bilong kilim binatang long wasim o spre long haus bilong yu. Binatang bilong Ebola i no inap stap laip wantaim ol strongpela marasin, o long lait bilong san, na ol sop samting.

Klinim ples bilong yu,

pamim marasin sapos yu gat ol doti enimal olsem ol rat na kokros. Ol dispela enimal ken karim sik Ebola raun. Taim ol enimal i dai, yu mas planim ol bodi bilong ol gut. Bodi bilong dai man i ken karim sik yet na husat man i holim bai kisim sik tu.

Lukautim yu yet. Yusim ol karamap bilong han na maus sapos yu bai go klostu long wanpela sik man o meri sapos yu ting em i gat dispela kain sik. Toksave hariap long haus sik sapos yu lukim kain sik long yu yet o narapela na yu tingting planti long en. Yu no ken wet.

Skulim olgeta lain, toksave long ol lain i stap klostu long yu. Sapos olgeta lain i kisim skul em bai yu stap seif. No ken serim bia wantaim narapela man o meri.

Wol tingim de bilong lukluk 2014

WOL Sait Dei em i de bilong mekim luksave bilong ai helt bilong lukluk, na em i save kamap long olgeta namba 2 Fonde bilong mun Oktoba long olgeta yia.

Yia 2013 em i gat bikpela mak long stori bilong Wol Helt Ogenaisesen (WHO) Eksen Plen wantaim bikpela toktok: **Yunivesal Ai Helt**

Dispela Eksen Plen em soim olsem bai ol pipel i kisim gutpela sevis long ai bai i stap insait long bikpela helt sistem.

'Yunivesal Ai Helt' i karamapim planti samting long toktok bilong helt bilong ai, olsem na Intenesenel Asosiesen bilong Stopim Aipas (IAPB) i bilip olsem yumi mas yusim wanpela bikpela toktok tasol olsem 'Yunivesal Ai Helt' bai i stap inap tupela yia na long wan wan yia, bai yumi lukluk long wanpela hap bilong developim narapela liklik toktok bilong 'singaut long eksen' mas kamap.

Long 2014, singaut bilong wokim eksen em i: **No gat moa aipas we yumi inap stopim.**

Helt bilong ai, i no stap olsem wanpela bikpela hevi long Papua Niugini.

Tasol i gat planti handet, tausen pipel bilong Papua Niugini i save kisim kain kain sik bilong ai.

Sampela i gat klaut i karamapim ai na sampela ai bilong ol i nidim glas. Dispela i putim hevi long ol lain i gat sik tasol em i givim hevi tu long ikononi.

Nesanel Privensen bilong Aipas Komiti bilong PNG(NPBLPNG)i kamap long mekim moa awenes bilong dispela hevi, wantaim fanding bilong IAPB. Dispela komiti i bungim olgeta bikpela lain save wok wantaim sekta, stat long Dipatmen bilong Helt optomolojis na nes bilong ai i go long ol narapela ejensi bilong kantri na ol intenesenel ejensi olsem Brien Holden Visen Institut, Fred Hollows Faundeses PNG, Kristen Blain Misin, Callan Sevis, PNG Ai Kea.

Wanwan bilong dispela lain ogenaisesen i gat wok bilong ol yet long mekim long kamapim gutpela ai helt netwok bai i stap longpela taim.

Ol i bung wantaim long kirapim wok bilong ai helt sekta insait long Papua Niugini. Dispela yia, long bihainim dispela bikpela toktok bilong Yunivesal Ai Helt, NPBL PNG i wok long kodinetim sampela wok insait long kantri.

Long Madang, Fred Hollows Faundeses bai opim nupela klinik bilong ol insait long Modilon Ahus sik; CBM bai go pas long wanpela de bilong opim operesen tieta long Goroka; long Pot Mosbi bai i gat pablik reli long Boroko, we St. John Sevis bilong ol Aipas, PNG Ai Kea na Pot Mosbi Jeneral Haus sik Ai Klinik bai i go pas long en.

Ol dispela bung bai pinis wantaim wanpela bikpela selebren long Pot Mosbi na PNG Ai Kea bai makim NPBL PNG long go pas long dispela.

Wairiki gat nupela haus

Michael Novingu i raitim

IS Nu Briten Provinsel Gavman na Edministresen i kisim pinis 40 hektas o hap graun long Wairiki long wokim nupela haus sik long en las wik.

ENB Provinsel edministreta Akuila Tubal i tok olsem provinsel gavman i kisim pinis 40 hekta graun long Wairiki plantesen long han bilong ol papa graun i kam aninit long Tabapit Enterprises.

Em i tok olsem ol i baim graun long moni mak bilong K3.5m long mak bilong 40 hektas. Na K295,000.00 em ol i givim long ol papa graun insait long wanpela bung ol i holim long Wairiki plantesen long las wik.

Em i tok olsem i no isi long kisim graun bihainim disisen gavman i mekim long wokim nupela haus sik bihainim long maunten paia i bagarapim Nonga Hausik long Rabaul Distrik long 1994.

Tubal i tok olsem long 15-pla krismas i go pinis gavman i traime long kisim graun long wokim nupela haus we bai stap long we long maunten Tavurvur bai das i no inap pundaun antap long en.

"Bihainim long Tavurvur i pairap long 1994, ol referel long ol arapela hap long NGI rijon ol i stopim na plenti sik manmeri i kisim taim nogut," Tubal i tok.

Em i tok olsem gavman i lukim olsem i gat nid long wokim nupela hausik long givim gutpela sevis long manmeri bilong ENB na Niugini Ailan wantaim.

Em i tok olsem pastaim memba bilong Gesel Sinai Brown i go pas long lain bi-



Piksa bilong maunten Tavurvur bihainim long paia long 1994 na i bagarapim olpela Nonga haus sik.

long em na givim luksave long gavman long givim graun bai mipela wokim haus sik. Em i tok tenkyu long Sinai Brown wantaim lain bilong em.

Tubal i tok Bikpla gavman i laikim tok orait pepa o taitol mas kam long han bilong gavman bai wok i stap hariap long wokim nupela hausik.

Siaman bilong Tabapit Papa graun kampani Sinai Brown i tok maski i gat hevi istap namel long dispela graun tasol mipela go het yet na stretim ol hevi na nau gavman bai wokim nupela hausik.

Sinai i tok olsem Nonga bai stap yet olsem provinsel hausik, mipela laik wokim referel hausik we bai ol nupela na strongpela masin bai stap long en long helpim na oraitim ol sik manmeri hariap. Em i tok mipela i no rausim Nonga Hausik, nogat em bai stap yet long helpim ol sik manmeri.

Sinai i tok olsem Tabapit kampani i papa long dispela hap graun na ol i bai wokbung wantaim gavman long wokim nupela hausik bai helpim ol manmeri long ENB na NGI na kantri wantaim.

Ol sumatin bai givim medikol helpim long Pasifik Gems

Isaac Liri i raitim

PASIFIK Gems Ogenaising Komiti (GOC) i makim 20-pela medikol sumatin bilong University of Papua New Guinea (UPNG) pinis long helpim long taim bilong 2015 Pasifik Gems.

Ol dispela 20-pela medikol sumatin i kisim pepa bilong ol pinis na ol i redi long givim medikol helpim long taim bilong dispela bikpela pilai.

Gems Medikol Komiti i bin makim ol dispela sumatin na givim ol trening long Pot Mosbi.

Ol Spot Marasin Spesolis i bin givim trening long ol dispela sumatin. Ol sumatin i bin lainim long givim medikol helpim long ol spot manmeri taim ol i kisim bagarap.

Sif Eksekutiv Opisa (CEO), bilong 2015 Pasifik Gems, Peter Stewart, i amamas long lukim olsem ol medikol sumatin bai givim helpim long taim bilong dispela bikpela pilai.



Ol medikol sumatin bilong UPNG husat bai givim medikol helpim long taim bilong 2015 Pasifik Gems Poto GOC.

Em i tok olsem medikol helpim em i bikpela samting long sait bilong helt na spot, na medikol helpim bai helpim ol spot manmeri long stap helti na strong na pilai gut.

Gems Sevis Menesa bilong GOC, Twain Pambuai, i bin tok tenkyu long ol sumatin long soim laik bilong ol long helpim.

Em i tokim ol olsem ol bai mekim bikpela wok long taim bilong dispela bikpela pilai, na em i laikim ol long mekim gut wok bilong ol.

Wanpela representiv bilong Pasifik Gems Medikol Komiti, Dokta David Inaho, i bin givim level 1 pepa long ol sumatin, na tokim ol olsem sans bilong

wok long Pasifik Gems i no save kamap planti taim, na dispela em gutpela long ol long sait bilong kisim ekspirians.

GOC i wok bung wantaim Medikol Skul long UPNG, na GOC i laik kisim moa long 70-pela medikol sumatin long givim helpim long taim bilong dispela bikpela pilai.

Ol VBA mama greduet

Sape Metta i raitim

HEVI bilong ol bel mama long Fayantina Lokol Level Gavman eria long Henganofi Distrik, Isten Hailans em ol bai edresim nau bihainim trening bilong ol Village Birth Attendants (VBA).

Ol mama i save bungim planti hevi long taim bilong karim ol pikinini insait long ol bus, aninit long kopi diwai na arere long ol liklik tais wara nau i kisim sampela luksave long wanem, planti long ol i ken kisim helpim em ol mama grup bai bringim i go long haus dua bilong ol.

Dispela bai kamap nau bihain long 23 mama i greduet wantaim setifiket bihain long kisim ol besik trening long program bilong Village Birth Attendants (VBA) long Henganofi distrik em NGO grup Touching The Untouchables (TTU) i bin go pas long ranim.

Fesiliteta o meri husat i bin go pas long skulim na trenim ol mama, Joan Songre, i tok planti ol mama husat i save itap long ol longwe ples insait long ol ruel eria we i nogat gutpela haus sik na helt senta i save kisim taim. Na planti long ol i save dai wantaim ol pikinini long taim bilong karim.

"Olsem na long adresim dispela hevi, TTU i kamapim dispela program long trenim ol mama na ol i ken kisim save i go bek long wanwan ol hauslain na viles bilong ol. Na mekim wok long helpim ol



Frieda Sam bilong Negire hauslain long Fayantina LLG eria long Henganofi Distrik Isten Hailans i wanpela mama i bin putim han i go antap long kisim skul long Village Birth Attendant trening program long kisim save long helpim ol lokel mama long taim bilong karim. Long poto em i sanap wantaim ol liklik wok samting em Rotary Klab ov PNG i givim we em bai yusim long helpim ol mama long taim ol i karim pikinini long ol viles na long ol hauslain. *Poto: Sape Metta*

mama long taim bilong karim.

"Taim ol mama i mekim olsem, ol i ken sevim gut ol mama long taim bilong karim, na planti long ol wantaim ol pikinini bilong ol i no ken dai long ol hevi bilong karim" Mis Songre i tok.

Em i tok, taim ol mama i wok long kisim trening, ol i bin kamapim prektikel wok tu long helpim ol mama i karim moa long 60 pikinini.

Na dispela em i gutpela wok ol i mekim, long wanem, ol bai helpim ol mama na ol pikinini long abrusim dai long taim bilong karim.

Wanpela NGO na patna bilong TTU em Mercy Works i luksave long ol mama husat i bin kisim trening long VBA program.

Dairekta na Kodineta bilong Mercy Works, Sista Maryanne Kolkia i tok, long lukim na harim ol mama i bungim hevi long taim bilong karim i save bringim bikpela pen tru long ol mama.

Em i tok sampela taim, mama bai lusim pait long stap laip na sampela taim mama bai lusim pikinini.

Sampela taim tupela wantaim i save lusim laip, na em i samting bilong sore.

Sista Maryanne i tok, long wol ripot, Papua Niugini i kam namba tu long mak bilong ol mama na ol pikinini i save lusim laip long hevi long taim bilong karim. Bikpela kantri Afganistan i go pas long dispela hevi.

Em i tok, "long sevim laip bilong ol mama na pikinini bilong mipela, ating em i taim nau long mipela olgeta i mas wok-bung na kamapim dispela kain trening program bilong ol mama, na ol i ken kisim save na helpim ol arapela mama long ol viles na hauslain komyuniti".

Ol mama husat i bin sindaun na kisim skul long Village Birth Attendant trening program i sanap na kisim poto wantaim ol wok samting em Rotary Klab ov PNG i givim long ol long yusim long taim ol i helpim ol mama long karim insait yet long hauslain na viles komyuniti bilong ol.

Poto: Sape Metta



Meri i mekim histori long Katolik Sios

WANPELA meri i mekim histori long Katolik Sios long kamap namba wan bos long Pontifikal Yunivesiti long Rom.

Sister Mary Melone i gat 50 krismas bilong ples La Spenzia long Itali i wanpela save meri na i gat bikpela eksperiens long akademik wok na long edministresen na menesmen long ol bikpela Katolik yunivesiti, institusen, skul na kolis.

Kongrikesen bilong Katolik Edukesen we Kadinel Zenon

Grochowski i go pas long en i bin makim Sister Mary Melone long dispela bikpela wok na ranim Pontifikal Yunivesiti we i kam aninit long ol Frias Minor kongrikesen.

Ol ripot i tok Sister Mary em i namba wan meri long kisim pemanen posisen long tioloji fakalti o dipatmen long dispela yunivesiti na tu, namba wan meri din o bosmeri bilong wanpela dipatmen long diuspela yunivesiti.

Nem masma i givim taim em i karim bikmeri ya em Maria Domenica, na em i bin pinisim skul long ol klasiks bipo long em i joinim ol Franciskan Sister na wokim fainol promis long yia 1991.

Bipo em i kisim nupela wok, Sister Mary i bin presiden bilong Sosaiti bilong Tiolojik Risets long Itali na bosmeri bilong Haia Institut ov Rilijes na Saiens "Redemptor Hominis". Long wok bilong ol meri long sios, Sister Mary i tok em i no

laik mekim wok glasim bikos long planti handet krismas, sanap bilong sios i bin stap olsem we ol man tasol i holim ol bikpela wok long sios.

Na sios i bin gat ol as tingting bilong em.

Tasol em i tok, "planti wok long dispela eria i stap, tasol senis i wok long kamap we yumi ken lukim na pilim. Na ileksen bilong wanpela meri long Pontifikal yunivesiti i wanpela long ol senis," Sister Mary i tok.



Yut, Meri na Famili
Pastor
Barbara Lunge

Het Pris i brukim bel bilong ol pipel

... "Yu pikinini man bilong mi. Tude mi kamap papa bilong yu. Askim mi, na bai mi givim olgeta manmeri long yu, na bai yu bosim olgeta hap graun. Bai yu bosim ol long strongpela han bilong yu. Na bai yu brukim ol liklik liklik, olsem man i brukim sospen graun." Buk Song 2:7-9

Het pris imas makim ol pipel na i go long ai bilong God na beten. "Nau...yumi gat dispela kain gutpela het pris istap, na em i sindaun pinis long hansut bilong sia bilong Namba Wan King long heven. Em i mekim wok pris long haus bilong God long heven, em haus tru bilong God. Dispela haus ol man i no bin sanapim. Nogat. Bikpela yet i bin sanapim. Olgeta hetpris i gat wok bilong bringim ol presen i kam long God na bilong mekim ol ofa long em. Olsem na Hetpris Jisas tu i mas mekim ofa." Hibru 3:1-3

"Olsem na yumi save, dispela kontrak Jisas i mekim, em i gutpela moa na i winim kontrak bilong bipo. Olsem na oltaim em inap tru long kisim bek ol manmeri i kam klostu long God long nem bilong em, long wanem, em i stap laip oltaim, na em i save beten long God long helpim ol." Hibru 7: 22, 25.

"Taim Jisas i stap long graun, em i save mekim prea na beten long God. Em i save, God inap long kisim bek em, na em i no mas i dai, olsem na em i beten strong long God, na em i singaut strong na i kraik planti. Em i save daunim laik bilong em yet na i aninit long God, olsem na God i harim beten bilong em. Jisas em i Pikinini Bilong God, tasol em i karim pen, na dispela i skulim em tru long pasin bilong bihainim tok bilong God." Hibru 5:7-8

".... Kraik Jisas i bin i dai, na em i kirap bek tu. Na nau em i stap long han sut bilong God, nae m i save askim God long helpim yumi." Rom 8:34

Dispela wok pris nau Jisas i givim long yumi Kristen na givim wok long yum i mas mekim dispela wok de na nait inap Jerusalem i kisim biknem long graun. Pasin nogut i kirap olsem wara tait na God i givim bel kaskas long ol Kristen i mas kirap na sanap long namel long beten bilong helpim olgeta pipel.

"Tasol God i makim yupela pinis, na yupela i stap lain manmeri bilong em stret. Yupela i stap lain manmeri i holi, em ol lain manmeri tru bilong God. Yupela i stap lain manmeri God i bin makim bilong em yet, bai yupela i ken tokaut long olgeta gutpela pasin em i bin mekim long yupela. Yupela i ken tokaut long em i bin singautim yupela long lusim tudak yupela i bin stap long en, em lait i gutplea moa yet." 1Pita 2:9.

Ol wasman antap long banis i no save slip bikos wok bilong ol em bilong was long get o bikpela dua. Tasol planti wasman i wok long slip long get. "...mi bin putim ol wasman, na ol bai i no inap passim maus long san na long nait. Mi bin tokim ol olsem, Yupela ol man bilong singaut long Bikpela yupela i no ken malolo. Nogat. Yupela i mas strong long singaut long em i go inap em i mekim Jerusalem i stap strong gen, na Jerusalem i kamap nambawan tru long ai bilong olgeta manmeri bilong graun." Aisaia 62:6-7

Maski, Jisas tui bin bel brukim taim e mi lukim hevi bilong ol pipel tasol yumi Kristen i no ken slip long dispela aua. "Em i lukim ol bikpela lain manmeri, na em i sori tru long ol, long wanem, tingting bilong ol i paul nabaut, na ol i stap nogut tru, olsem ol sipsip i no gat wasman. Olsem nae m i tokim ol disaipel bilong em olsem, "Planti kaikai tumas i mau pinis long gaden, tasol i no gat planti wokman is tap bilong kisim. Olsem na yupela i mas beten long Papa bilong gaden, bai em i salim ol wokman i go bungim kaikai bilong em." Matyu 9:36-38

Yumi mas givim taim bilong yumi, talen na ol presen bilong yumi na singaut bilong God gut na bai wanpela de bihain taim, yumi no ken sem long em taim em i kam bek. God i salensim yumi long wok patna wantaim Jisas, Holi Spirit na ol ensel long karim aut prea ministri wantaim bilip na sanap strong long en.

Toksave: Ol mama i gat wari, tingting planti, bel hevi yu mas kontekim mi na bai mi helpim yu. Kisim mi long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 70995378 o salim email long:

Lahir Ailan Katolik Sios holim konpermasio lotu ... Klostu 200 i kisim sakramen

I kam long LMALA Midia

MOA long 200 sumatin long 4-pela ples insait long Lahir Ailan, Nu Ailan Provins i bin kisim Sakramen bilong Konpermasio long Sande, Oktoba 5 long Sen Clement Katolik Sios, Palie long Lahir Ailan.

Katolik Bisop bilong Kavieng Daiosis, Ambrose Kiapseni i bin go pas long dispela seremoni we planti pipel i gat long en ol papamama, ol pren na hauslain bilong ol ples olsem Lakuplein, Kinami, Palie na Matzuz i bin kamap long dispela lotu selebren.

Long skul bilong Katolik Sios, Sakramen bilong Konpermasio i save pinisim wok long kisim man i go insait long sios bihain long ol Sakramen bilong Baptismo, Penens na Santu Komyunio.

Long tokskul bisop i givim long 278 yangpela sumatin, Bisop Ambrose i tokim ol i olsem ol han bilog grep o rop bilong prut wain na ol yet i mas givim gutpela kaikai long givim swit long maus.

"Sapos yupela i no wokim raitpela samting nau, ol prut grep bai gro sawa na ol bai no inap painim ol rut bilong ol insait long komyunio," Bisop Ambrose i tok.

Bisop Ambrose bilong Lahir Ailan yet i tokim ol sumatin olsem planti pikinini na ol



KONPERMASIO: Bisop Ambrose Kiapseni i givim Konpermasio blesing i go long wanpela skul pikinini meri long Sen Clement Katolik Sios long Lahir Ailan.

bikpela yangpela manmeri tude i no givim gutpela luksave long ol papamama na ol lapun long ol komyunio bilong ol.

"Kisim skul i kamap olsem nomol laip long Lahir Ailan, tasol planti pikinini i no save bisi tumas long skul gut, no gat.

"Planti i lukim maining olsem we bilong laip na kisim mani long en. Nupela teknoloji i senisim laip, sosel straksa na rilensensip bilong planti pipel. Dispela i ken trupela long nau

taim, tasol i no gat long bihain taim," Bisop Ambrose i tok.

Bisop Ambrose i bin mekim tok lukaut long ol mobail fon taim em i tok planti hevi i wok long kamap tude bikos pipel i no yusim gut ol mobail fon.

"Olgeta hap yu lukluk, olgeta skul pikinini i holim na yusim mobail fon i stap. Mi wari sapos tingting bilong ol pikinini i stap long skul wok na tu, long sait bilong bihainim gutpela na stretpela pasin," Bisop Am-

brose i tok.

Bisop Ambrose i bin tokim ol sumatin olsem Sakramen bilong Konpermasio i strongim ol moa long bilip bilong ol na tu, fokus long Santu Spiritu.

Ol 7-pela gif bilong Santu Spiritu em long wisom o gutpela save, understanding o luksave, counsel o gutpela stia, fortitude o courage o mekim man i strongpela, piety o pasin long mekim stretpela samting na fear o pret pasin long Bikpela.

Nupela SVD transit haus


Veronica Hatutasi i raitim

DIVAIN Wod Kolis (SVD) long Katolik Tiolojikel Institutu long Bomana ausait long Mosbi i gat nupela transit haus.

Haus ya em ol visita o ol lain SVD pater na bruder i kam mekim sampela wok long Mosbi tasol i no gat ples bilong slip i ken go long em.

Supiria Jenerel bilong ol SVD long wol, Pater Heinz Kuluke i bin opim dispela nupela SVD transit haus long mun Julai long dispela yia taim em i bin mekim lukluk raun i kam long PNG.

Olgeta hap we ol SVD kongriksen i stap na wok long en, ol i save lukautim gut ol lain bilong ol na dispela i karamapim tu ol visita na ol lain i go long sampela wok na i stap sotpela taim long wan-



1- KATIM RIBEN LONG OPIM: Supiria Jenerel bilong ol SVD long wol, Pater Heinz Kuluke i katim riben long opim nupela SVD transit haus long SVD Kolis long Bomana. Pater Heinz i bin mekim opisel wokabaut i kam long PNG olsem hap wok bilong em long raun lukim ol kongriksen bilong em i stap wok long samting olsem 80 kantri long wol.

3- BIHAIN LONG BLESING LOTU: Ol sampela pren bilong SVD i bin selebretim opim bilong nupela SVD transit haus bilding bihain long lotu na bung kaikai. Ol Poto: Veronica Hatutasi.

pela daiosis, peris na komyunio.

SVD kongriksen i gat 6,000 misinari long wol. Long ol dispela, 3,000 em ol Holi Spirt Sister (SSpS) i stap wok long 40 kantri na 340 Adoresen Sister i wok long 22 kantri.

Long PNG yet, i gat 100

SVD misinari i wok i stap na 30 pesen em ol asples PNG lain i wok olsem ol pater, Bruder na ol SSpS Sister.

Pastaim i bin gat samting olsem 300 SVD misinari long PNG, tasol bikos SVD i wanpela intanesenel kongriksen, ol i salim planti i go aut long ol

misin ovasis olsem long Saut Amerika, Afrika na ol narapela kantri moa.

Namba wan SVD misinari Pater Arnold Jansen SVD na ol lain bilong em i bin krugutim graun bilong PNG long yia 1907taim ol i kam sua long Sepik.



Kristen i mas bilas na redi long olgeta de

LONG las Sande Tok bilong God i kam long Santu Mathew 22:1-11 we Jisas i autim tok piksa bilong marit kaikai long makim Kingdom bilong God.

Em i mekim piksa stori long wanpela kin we pikinini man bilong em i laik marit. Na king i mekim bikpela kaikai na salim invite-sen i go aut long ol man i kam bung long lukim marit na bung wantaim long kaikai.

Taim kaikai i redi, king i salim ol wok boi i go aut na singautim ol i kam.

Sori tru, i no gat wanpela i putim yau na harim. Singaut i popaia nating.

Namba tu taim em i salim ol narapela wokboi gen long go na singautim ol lain husat king i bin invaitim ol long kam.

Dispela taim king i redim kaikai pinis olsem na em i hariapim ol long kam kwik long dispela bikpela marit kaikai.

Tasol, sori tru, i no gat wanpela bilong ol i harim tok bilong ol wokboi bilong King na ol i go nabaut. Sampela i go long gaden, ol arapela i bisi long bisnis na sampela i kirap na mekim no gut long ol na kilim ol i dai.

King i bel hat na salim ol soldia i go na pinisim ol dispela hambak lain husat i mekim no gut long ol wokboi. Nau King i salim ol wokboi gen bikos kaikai i redi pinis.

Dispela spesel invitesen i go long ol man tasol, ol i popaia pinis.

Olsem na em i salim ol wokman i go na bungim husat i sanap long wanem hap kona bilong rot na ol i kisim ol i kam insait long dispela bikpela marit kaikai i bin redi pinis.

Taim olgeta i bung pinis na redi long kaikai, king i kam insait na lukim olsem sampela bilong ol ol i no putim bilas bilong marit stret, na king i bel hat na salim ol i go aut long ples tudak.

Dispela em wanpela gutpela tok piksa Jisas i givim long yumi.

Papa bilong bikpela marit kaikai em Papa God, pikinini bilong King i makim Jisas, ol wokboi bilong em i makim ol misinari kam na autim Tok bilong God na bungim yumi long insait long Haus bilong God na bikpela marit em i makim Kingdom bilong God.

Long ves 11 King i salim ol wokboi gen i go long olgeta hap maus rot na singautim ol gutpela na no gut wantaim long kam insait.

Nau, dispela invitesen em yumi olgeta na invitesen i no bilong nau tasol, Nogat! God i bin invaitim yumi pinis long taim tru.

Em dispela taim yumi tok yesa long sakramen bilong Baptismo na em i wok long invaitim yumi olgeta de, Holi Eukarist long olgeta Misa long Sande na wikde.

Yumi mas glasim gut long dispela tok piksa bilong Jisas long ves 11 (Conduct of the Dressing Code) Weding gament o klos bilong marit em i makim ol lain husat i tanim bel, senis long hat, tingting na surukim yet long stap gutpela laip long pasin lotu.

God i laikim yumi long gutpela bilas insait long laip bilong yumi. i no long arasait bilas.

Olsem, Santu Paul i tok, long Efesus 6:10-20, ol kristen i mas bilong gut na i stap olsem ol soldia.

Tru, planti kainkain pasin bilong dispela graun i save daunim laip bilong yumi, tasol yumi mas larim dispela ol samting i stap beksait na tok yes na pas gut oltaim wantaim em.

Yusim gut mani bilong kantri long helpim ol pipel

Ol memba bilong Palamen i bung gen long dispela wik. I gat planti bikpela samting i stap long ajenda na ol memba bai bisi tru long paitim toktok na skelim ol senis gavman i laik kamapim. Dispela bung bilong Palamen bai i karamapim tu mun Novemba na 2015 baset. Taim i ran hariap tru na klostu dispela yia 2014 i pinis nau. Long baset bilong 2014, gavman i bin putim mak long K15bilien. Em i bikpela mani tru na i winim tru mak bilong mani gavman i save makim long baset bilong kantri.

Ol pipel i laik save mani bilong 2014 baset i kamapim wanem kain gutpela wok bilong helpim sindaun bilong pipel. Ol developmen projek bilong 2014 i kamap tu o nogat?

Ol memba bilong Palamen i save kisim mani long Pablik Invesmen Program (PIP) long kamapim ol projek bilong ol.

Long dispela yia, yumi harim ol memba bilong Oposisen i wok long pairap planti bikos ol i no bin kisim skel bilong ol. Ating ol i kisim olgeta mani bilong ol pinis nau o?

Long Mosbi, ol bikpela wok bilong sanapim ol nupela spot stadium na rot na ol haus i soim olsem gavman i spendim bikpela mani.

Tasol plen bilong olgeta dispela bikpela wok i bin stap tu



long 2014 baset o nogat? Ating sampela i mas kamap bihain long olgeta tok orait bilong 2014 baset olsem na nau kantri i mas painim mani long ol narapela rot long kamapim ol dispela projek.

PNG i bin kisim bikpela dinau tru long stretim hevi bilong gavman na nau yumi mas bekim dinau olsem na long 2015 bai i gat salens i kamap sapos gav-

man i sot long mani. I gat toktok i kamap pinis olsem baset bilong 2015 bai i go daun bikos kantri i no kisim yet mani bilong LNG.

Mani bilong LNG i go long bekim dinau bilong PNG olsem na mani bai sot long 2015. Yumi no save sapos dispela toktok i tru o nogat.

Bai yumi mas wet inap Minista

bilong Treseri i tokaut long 2015 baset long Palamen.

Pasin bilong lukautim gut mani na bihainim stret plen bilong yusim mani em i bikpela samting.

Gavman i wari long dispela pasin bilong westim mani bilong kantri. Long dispela wik, namba wan seketeri bilong gavman i givim strongpela tok lukaut i go

long ol pablik sevan.

Em i tok ol i no ken westim taim na mani long go long ol miting na konprens long ovasis na hia long PNG tu.

Em i tok ol i lusim bikpela taim na mani bilong kantri long raun i go kam na ol i no tingting long mekim wok bilong ol. Ol dipatmen i mas bosim gut mani bilong ol na i no ken abrusim baset bilong ol.

Bos bilong dipatmen i gat bikpela wok bilong sekap oltaim na lukim olsem ol pablik sevan aninit long em i mekim stret wok na baset bilong ol i orait.

Ating namba wan seketeri bilong gavman i mas toktok long ol pablik sevan bilong Mosbi husat i save sindaun long ol ea kondisen opis.

Ol i gat ol poro long ol arapela dipatmen husat inap helpim ol long hariap long go long ol miting. Tasol i gat planti moa gutpela pablik sevan husat i save hatwok long mekim wok bilong ol.

Ol i wok stret na planti taim i no gat gutpela luksave long hatwok bilong ol.

Nau em i taim bilong ol memba bilong Palamen long skelim 2015 baset.

Mani long baset em i bilong ol pipel bilong Papua Niugini na ol politisen na pablik sevan i mas luksave long bikpela wok ol i gat long lukautim gut mani na yusim long stretpela rot long helpim ol pipel.

Gavman mas wokim moa haus

Haus em bikpela samting tru long planti wokmanmeri insait long ol bikpela taun na siti olsem Pot Mosbi, Lae na arapela senta tu.

Plantu woklain i save painim hat long slip na go long wok olsem na ol save go insait long ol setlemen na blok na wokim haus we yumi lukim planti pinis long ol Mosbi na Lae, Madang, Goroka na arapela moa.

Turangu ol wokmanmeri bilong Gavman o pablik sevens em ol nogat tru gutpela hausing alawens bilong baim rent olsem na ol save lokim wantaim ol wantok o wokim haus nabaut long blok na slip.

Ol save kisim tasol K7 long hausing alawens we dispela i nogat wanpela mining tru long en long helpim pablik sevens long rentim haus.

Ol haus bilong rent em mak long K600 fotnait go antap long K1200 long fotnait. Em ol wan rum haus mi

tok long en. Gutpela nius nau yumi ritim



na harim olsem Praim Minista Peter O'Neill i bin kamapim bikpela hausing skim projek we gavman i putim K200 milien go long Benk ov Saut Pasifik (BSP) bai ol wokmanmeri ken kisim olsem dinau na baim haus o wokim haus bilong ol.

Sampela wokmanmeri i stat kisim pinis dispela helpim. Dispela em gutpela tru bikos planti pablik sevens na ol wokmanmeri wok long painim kain sans olsem we ol mas gat sampela kain mani long baim haus o wokim haus.

Nesenel Hausing Kopresen (NHC) tu i kamap pinis wantaim ol hausing projek plen bilong em na dispela mas kamap hariap long

sevim ol wokmanmeri bilong yumi long PNG.

Gavman tok long makim olsem 40 krismas long bekim bek dispela dinau em gutpela tru bikos maski papamama i pinis wok o bungim hevi, haus bai go long ol pikinini long lukautim na bekim dinau yet go inap 40 krismas.

Ol tok interes o win mani bilong dinau em tambolo tru long 4 pesen (%) mak na em gutpela mak stret.

Dispela bai helpim tru planti ol skul tisa, ol nes na Dokta na ol planti pablik sevens husat nogat haus na save hangamap na paspas wantaim ol wantok o tambu na go kam long wok olgeta de.

Ating dispela tu bai helpim tru planti ol woklain we kampani bilong ol ken go pas long kisim graun na ol woklain ken go insait long dispela hausing skim o projek long kisim lon na wokim haus bilong ol.

Sapos Gavman i baim

graun pinis na wokim haus orait em gutpela long ol pablik sevens ken kisim dinau tasol na baim aut ol dispela haus na kisim.

Plantu kampani na bisnis save givim tu hausing alawens long ol wokmanmeri bilong ol olsem na dispela i ken mekim isi tru long ol baim haus bilong ol we kampani bilong ol ken go pas long en long stretim pepa na agrimen bilong benk ken bihainim na givim dinau bai ol woklain ken peim haus bilong ol.

Hausing Alawens bilong ol bai go bekim benk dinau.

Em wanpela gutpela plen we Gavman bilong Peter O'Neill mas sanap strong long en bikos dispela i kam stret long tingting na wari bilong ol pipel tude.

Putim mani bilong ol pipel go stret long stretim hevi na wari bilong ol we ol ken pilim tru na lukim stret.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantok.com.pg

Pe bilong wanpela yia
Websait: www.wantokniuspepa.com
Pe bilong wanpela yia, 52 niuspepa

PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga
Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing blong bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas


FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...

Amamas bilong Silva Jubili bilong Fr Paul Liwun



Sampela bilong ol famili husat save pas klostu long Fr Paul taim em pater long St Peter Channel long Erima. Ol dispela famili save painim hat long lusim Fr Paul na taim em kisim Silva Jubili long wok olsem pater long PNG long 25 yia, olgeta bin salim tok long em kam amamas wantaim ol long Erima haus lotu.



GIVIM PRESEN: Ol bikman bilong St Peter Channel sios bin luksave long wok bilong Fr Paul Liwun taim em stap Pater long St Peter Channel haus lotu long 13-pela yia olgeta. Fr Paul Liwun i wok pater 25 yia olgeta long Papua Niugini olsem na ol lain long Erima Katlik sios bin amamasim Silva Jubili bilong em wantaim em. Ol Poto Nicky Bernard



Ol mama grup bilong Erima peris bin luksave tu long Fr Paul na givim sampela presen long em long amamasim Silva Jubili bilong em.

Lukim laip stori bilong Fr Paul Liwun long pes 8.

EMTV Television Guide

FONDE OKTOBA 23, 2014

8:40 PM G HOT SPOT Ep#33
9:10 PM PG ELITE MUSIC ZONE #31
9:40 PM G NEWS REPLAY
.....followed by the Australia Network

SLEEPOVER CLUB S1 EP#11/26
SHAK S6 EP#1/40
5:30 PM G SKIPPY - Puppets
5:55 PM G CRIME STOPPERS
6:00 PM G EMTV NATIONAL NEWS
7:00 PM G IN MORESBY TONIGHT - ALERT THREATENED SPECIES
7:30 PM PG FRIDAY NIGHT MOVIE
8:30 PM MA EMTV NEWS REPLAY
.....followed by the Australia Network

AUSTRALIA NETWORK
8:30 AM G SKILLICIOUS S2 EP#7/7
9:00 AM G DANI'S HOUSE S2 EP#2/12
9:30 AM G ULTIMATE GUINNESS WORLD RECORDS - EP#31/52
10:00 AM G PACIFIC WAY EP#16 - Rpt.
10:30 AM G SKIPPY - Puppets - Rpt.
11:00 AM G AUSTRALIA NETWORK
5:30 PM G OLSEM WANEM EP#39
6:00 PM G EMTV NATIONAL NEWS
6:30 PM G SECRET MILLIONAIRE USA - RAIT MUSIK repeat
8:30 PM MA MOVIE - RISKY BUSINESS
10:00 PM G EMTV NEWS REPLAY
.....followed by the Australia Network

AUSTRALIA NETWORK
3:30 AM G AUSTRALIA NETWORK
6:30 AM G EMTV NEWS REPLAY
7:00 AM G HILLSONG
7:30 AM G AUSTRALIA NETWORK
9:00 AM G BUSINESS PNG YR.3 EP#38 rpt.
9:30 AM G AMAZING SPIES Ep #4
10:00 AM G OLSEM WANEM EP#39 - RPT
10:30 AM G RESOURCE PNG EP#37 - Rpt.
11:00 AM G ITALIAN KHANNA Ep #2
11:30 AM G ITALIAN KHANNA Ep #3
12:00 PM G AUSTRALIA NETWORK
5:30 PM G LOVE PATROL S6 Ep #02
6:00 PM G EMTV NATIONAL NEWS
6:30 PM G VOCAL FUSION S1 - Ep#11
7:30 PM G TOK PIKSA - EP#2014/44

FRAIDE OKTOBA 24, 2014

4:00 AM G AUSTRALIA NETWORK
5:00 AM G JOYCE MEYER 1099-5
5:30 AM G EMTV NEWS REPLAY
6:30 AM G TODAY
09:00 am G CLASSROOM BROADCASTS
3:30PM G KIDS KONA
HI 5 S12 EP#38/39
NEW MACDONALD'S EP#51/52


SARERE OKTOBA 25, 2014

4:30 AM G AUSTRALIA NETWORK
6:00 AM G EMTV NEWS REPLAY
7:00 AM G IN HIS STEPS EP#33

SANDE OKTOBA 26, 2014

4:30 AM G AUSTRALIAN NETWORK
5:00 AM G JOYCE MEYER 1099-4
5:30 AM G EMTV NEWS REPLAY
6:30 AM G TODAY
09:00 am G CLASSROOM BROADCASTS
KIDS KONA
HI 5 S12 EP#37/39
NEW MACDONALD'S EP#50/52
SLEEPOVER CLUB S1 EP#10/26
SHAK S5 EP#33/33
5:30 PM G PACIFIC WAY EP#16
6:00 PM G EMTV NATIONAL NEWS
7:00 PM G RAIT MUSIK EP#232
8:00 PM G RESOURCE PNG EP#37
8:30 PM G SOKA XTRA EP#31

TORO



BIABIA



KANAGE



SUDOKU

8 2 7 6 5 3 4 1 9
1 5 3 9 4 2 6 8 7
9 6 4 1 7 8 5 2 3
3 7 9 2 6 5 8 4 1
6 8 2 3 1 4 9 7 5
5 4 1 7 8 9 3 6 2
7 9 6 4 3 1 2 5 8
2 1 8 5 9 6 7 3 4
4 3 5 8 2 7 1 9 6

Ansa bilong las wik Sudoku # 66

5 1 7 9
9 8 1 9
6 3 9 1
8 1 3 8 4 9
3 7 7 8
7 2 6 8
5 8 2 7 9

Ansa bilong Sudoku # 67 neks isu

ESKI POTNAIT
POIN R AISM
TASIAMANT I
ISIA IAGRAUN
HANISIURM I
SAKTUSORAIT
TULFUWES
PIR POLUSEN
MAPESTON
ATRIGAAPIK
ISIOSPINNA
NIMAMARSCHAN
ILAAOPISE
MOTINSEAKIS

Ansa bilong las wik krowod, isu # 2093

1 2 3 4 5 6 7 8 9 10 11 12 13
14 15 16
17 18 19
20 21 22 23 24 25 26
27 28 29 30 31
32 33 34 35 36 37 38 39
40 41 42 43
44 45 46 47 48 49 50 51 52 53 54 55
56 57 58 59 60
61 62 63 64 65 66 67 68 69
70 71 72 73 74 75
76 77 78 79
80 81 82
83 84 85 86 87 88 89
90 91 92 93 94 95 96 97
98 99 100 101 102 103 104 105
106 107 108 109 110
111 112

KROSWOD

- Antap 1 Kampani laik painim gol long solwara
7 De mama i karim Jisas
14 Sel mani bilong Nu Ailan
15 Dipatmen i lukautim mani bilong ol main
16 Gutpela tru
17 Lapun long tok Inglis
18 Pekato
19 Kaikai ol i wokim long susu
20 I gat ples long putim samting
23 Draipela wara kontena
24 Bekim
27 Binen
28 Namba wan Praim Minista
31 Bilong lukim samting
32 I no hatwok
33 Ol soldia
34 Strongpela kantri long wol
36 Skelim
40 I no aut
41 Pasim tok
42 HIV i kamapim dispela sik
44 Banis bilong susu
46 Namba faiv mun
47 Ailan provins
49 Presiden bilong USA
52 Sik tuberkulosis
53 Jisas i tok em i wasman bilong ol
56 Mobail fon kompani
58 Bilong harim
59 Pasindia ka
60 Apim na wokabaut wantaim
61 Pawa i stap olsem bai masin i wok
63 Yu tasol
64 Stik bilong wipim man
66 Bilong wasim samting
67 Kurakum
70 Yunaitet Nesen
72 Stori pes long mobail
74 Laikim tru
76 Ailan long Milen Be
79 Askim
81 Draiva bilong balus
82 Tul bilong katim plang
83 Em
85 Nem bilong man
86 Salim toktok long mobail (salim SMS)
89 Gret long skul
91 Wankain olsem 33
93 Bikpela skin
95 Pairap
97 Mak bilong kompas
98 Wok didiman
103 We ol samting i stat
105 Not Atlantik Triti Ogenaisesen
106 Mr long tokples Kuanua
107 Ailan long Marobe
108 Infomesen Teknologi
109 Likwifait Netur el Ges
111 Kastam
112 Nupela provins
Daunbilo
1 Tok pilai nem bilong ol Nu Ailan
2 De i go pinis
3 Lain i lukautim turis bisnis
4 London Misineri Sosaiti
5 Abus bilong solwara
6 I givim lait long graun
7 I no hat moa
8 I no stap outsait
9 Lait
10 Ring wanpela taim na stop
11 Begin
12 Samting bilong kilim abus
13 Viles
14 Namba wan siti long PNG
21 Bilong sindaun
22 Mun bilong Krismas
23 Tenkyu
25 Nogat
26 Moning taim
28 Fada Krismas
29 Yu tasol
30 Lo
35 Nem bilong meri
37 Mak bilong rula
38 Mama bilong Jisas
39 Long taim bilong Jisas
41 Mani bilong baim wok
43 Spak drink
45 Sias long PNG
46 Bilas bilong ol tumbuna
48 Strongpela kantri long wol
50 Binen
51 Namba faiv mun
52 Dring long moning
54 Karamap bilong bodi
55 Givim samting long ama masim narapela
56 Wasman bilong ol sikman
57 Institut ov Nesenel Afeas
59 Hap bilong bodi
62 Fon bilong karim raun long poket
63 Sain
65 Luksave mak bilong wanwan
samting
68 Nem bilong ol Hula
69 Madang, Morobe na Sepik
71 Distrik long Saten Hailans
72 Nem bilong meri
73 Bilong pasim klos
75 Graun bilong nambis
77 Wewak i stap long dispela Sepik provins
78 Redi pinis long kamautim
79 Westap
80 Wankain olsem 41
84 Wanpela diwai
85 Enimal
87 Kaikai
88 Samting bilong sindaun
90 Pisin bilong wara
92 Kumul bilong Enga
93 Bilong kukim
samting
94 Ples graun malmalum
96 Hait na kism nating samting
99 I no kam
100 Mani masin
101 Siti long Kalifonia, USA
102 Salim mani kwik
104 Em i soim rot long tripela king i go long Betlehem
110 Nesenel Alaiens

EMTV Television Guide

Table with columns for time slots (e.g., 8:00 PM G, 9:00 PM MA), program titles (e.g., 60 MINUTES, MOVIE: THE REPLACEMENTS), and dates (e.g., MANDE OKTOBA 20, 2014, TUNDE OKTOBA 21, 2014).

Ol Progam na Kilok i ken senis oltaim...

Ol wiken poto nabaut



NAISPELA PILAI GRAUN STRET: Ol Filipino komyuniti bilong Kokopo i save go lukim pilai long Kalabon ragbi graun taim pilai i save kamap long hap long wanem em gutpela hap long pilai. Taim pilai i pinis, ol i save go insait long pilai grun na sidaun long kisim gutpela win.



KOKOPO LUKIM KOKOMO: Bikpela ragbi pilai namel long PNG Kumuls na Australia Kangaroos long Kokopo i pulim Kokomo long go soim em yet olsem Pasifik Gem tu i kam klostu long 2015.



LIKLIK PRAIS GUTPELA HAP: Vavagil Guest Haus em i wanpela liklik ples bilong slip we planti manmeri i save laikim long wanem, bai ol i malolo gut na mekim wok bilong ol. Ol dispela meri save lukautim na klinim olsem ol bikpela hotel. Long las wiken, ol meri olsem tupela woklain ya i bin hat wok tru long wanem olgeta rum bin pulap. *Ol Poto Nicky Bernard.*

Raun wantaim Kanage olgeta wik

Yu laki man ya
KANAGE tokim liklik pikinini bi long em long go baim mutrus bilong em na pikinini tok em i les. Em nau Kanage belhat na kirap paitim em. Meri bilong Kanage harim pikinini kra i na em i siksti kam ausait long haus na askim Kanage. "Kela bun bun, yu pitim nating pikinini long wanem?" Kanage kirap na tokim meri bilong em olsem. "Mama yu noken askim mi dispela kwesten, samting mi wok hat na dispela pikinini kamap, olsem na sapos em i bikhet, mi gat olgeta rait long paitim na skulim em." Em nau meri bilong em kros na kirap tokim em. "Dispela wok bilong wok hat na kamapim ol pikinini yu save tumas. Tasol long wokabaut i go na baim mutrus yu pilim skin les." Meri bilong em i tok olsem na mekim Kanage i belhat na kros nogut tru, na i kirap tokim meri bilong em. "Gutpela tru na yu kam mar-



itim mi, na yu stap gut olsem na yu hambak. Ating sapos papa antap i no wokim mi, bai yu painim man i go nogat na bai yu go poromanim wanpela dok man na karim dispela yau pas pikinini ol i save kolim hapkas dok na sipsip.
Friedson Kipas BULOLO, LAE.

Toktok gut ya!
KANAGE i bilong ples Butibam long Lae Siti, na em i maritim wanpela meri Okapa na ol stap long ples bilong meri bilong em longpela taim tru. Wanpela taim tupela i kalap long PMV bas na i laik go long Lae.


Bas i go kamap long Makam veli na meri bilong Kanage i askim em, "Ngan bron mi, yu ting orsem wanem Rai i kam krostu pinis o nogat?" Kanage bekim na tok, "yu kolim gut, i no Rai-Rei." Ol nara-pela pasindia long bas harim olsem na kirap tokim Kanage, yu tu kolim gut, i no Rei nem bilong ples em Lae." Kanage harim olsem na spet long windo bilong glas.

Norbert Berere Stoneth MADANG

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email:
jjwilson@wantok.com.pg

Mi gat wari na mi laik helpim

Dia Laipain
MI GAT wanpela rol modul o man o meri i soim gutpela pasin long laip mi ken bihainim. Na dispela rol modul bilong mi i bin lusim skul long Gret 6 planti yia i go pinis long wanpela longwe praimer skul long wanpela provins long dispela kantri.



Dispela man i no bin laik bai ol i kolim em long wanpela Gret 6 dropout husat i no inap long kamap wanpela gutpela man i mekim wanpela gutpela samting long laip bilong em. Olsem na Laipain, dispela man i bin lusim ples bilong em na go stap long taun na painim wanem samting em i laikim long en.

pilim olsem em i rol modul long planti tausen narapela pipel long PNG husat i stap long wankain wari na laip olsem long yu.

Em go long taun na stap wantaim wanpela famili we i bin lukautim em. Taim em i stap wantaim ol, em i no stap nating, nogat. Em i stat long bungim ol sof dring botol na ken ol man i dring pinis na tromoim long en, na ol narapela liklik wok long kisim mani long en.

Pren, mipela i laikim yu long save olsem long wokabaut long laip, yu mas wokim ol plen, baset i makim taim na fokas long ol driman na gol bilong yu. Mipela i bilip olsem dispela bai kamapim gutpela samting long laip bilong wanpela taim ol i laik wokim ol samting bai bagarapim sindaun na laip bilong ol.

Taim em i bungim inap mani, em i stat long peim skul fi bilong em yet stat long Gret 7 inap long Gret 12. Bihain long dispela, em i go long Yunivesiti bilong PNG na stadi long lo skul. Nau em i kamap wanpela loya na nau i wok wantaim wanpela lo kampani long kantri.

Taim wanpela man i laik wokim wanpela samting, mipela i bilip olsem i moabeta long gat bilip long em yet bikos no gat narapela bai gat strongpela tingting long mekim samting, tasol yu yet. Pren, mipela i bilip olsem rol modul bilong yu i go pas pinis long soim rot long yu i bihainim sapos yu laik mekim gutpela samting long laip bilong yu. Yu ken tokim yu olsem sapos em i ken mekim, mi ken mekim tu.

Hevi bilong mi em, mi wanpela skul dropout tu ya. Na planti taim, mi laik bihainim pasin bilong dispela man tasol ol samting i no wok gut long mi. Nau mi kros i stap na pilim olsem nogat wanpela gutpela samting bai kamap long laip bilong mi. Bai mi mekim wanem samting long helpim mi yet?

Mipela i luksave olsem rol modul bilong yu i bin lusim skul long Gret 6 tasol mipela i bilip tu olsem sampela samting i bin mas mekim em i lusim ples long painim samting i ken givim em gutpela sans long laip.

Plis Laipain, inap yu painim sampela rot long helpim mi?
Role Models Peace Seeker

Em bin kisim planti yia long kamap long mak em i stap long em tude. Em bin mas lukim tu olsem em i no laik sindaun nating na lukim ol wankul bilong em i skruim skul long apa level na kisim gutpela laip, tasol em bin laik kamap olsem wanpela long ol.

Dia Pren,
Mipela i amamas olsem yu tokim mipela long win stori bilong rol modul bilong yu na man we ol hatwok bilong em yu amamas long en na yu laik bihainim long en. Dispela rol modul i bilong yu tasol mipela i

olsem i ken gutpela long yu i kros na bai mekim yu i wok hat moa long inapim gol bilong yu. Pren, noken ting olsem yu no inap long wanem samting yu wokim. I moabeta yu kisim sampela luksave na lusim ol poroman yu gat nau bikos ol i ken mekim yu bagarapim tingting bilong yu. Mipela i bilip olsem ol bai no inap helpim yu long mekim gut long skul na laip bilong yu.

Pren, mipela i laik strongim yu long tokim ol long laik bilong yu long skruim skul na sapos ol i gat wankain wari olsem yu, yu ken toktok tu long ol. Laipain i bilip olsem long dispela kantri, PNG, i go het gut, em i wok bilong ol manmeri i kisim skul long mekim dispela.

Mipela i bilip olsem em i taim ol yangpela pipel olsem yu long tingting gut long wanem samting yu ken mekim sapos yu kisim gutpela edukesen. Pren, mipela i askim yu long save olsem yu wanpela skul dropout aut, tasol ol samting i no pinis hia, nogat. Yu ken go het na traim na i napim ol driman bilong yu.

Sapos yu tok olsem yu lus, bai yu stap olsem wanpela dropout oltaim. Na dispela bai givim yu wari na hetpen, long famili bilong yu na kantri tu. Tasol yum as muv i go fowet, wok hat na mekim gut. Yu ken kamap olsem gutpela rol modul long ol narapela pikinini na ol yangpela.

Pren, God i save totkok long manmeri i stap long ol kain wari na hevi na em i laik toktok long yu tude sapos yu opim lewa bilong yu long em.

Ritim buk bilong ol Proverb 4:10-13.

Laipain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.
Laipain

Ol PNG gavana i laikim moa atonomi

SAMPELA gavana i laikim nesenel gavman long givim ol moa pawa long lukautim ol provins bilong ol yet.

Dispela toktok i bin kamap long bikpela miting bilong ol gavana em i bin pinis las wik Fraide long Kavieng, biktaun bilong Nu Ailan provins.

Klostu olgeta gavana bilong 22 provins bilong kantri i bin stap long dispela miting em Praim Minista, Peter O'Neill i bin opim long las wik Tunde.

Wanpela bikpela samting ol i bin lukluk long en em ol senis long Ogenik Lo we i save lukautim wok bilong ol provinsel na lokel level gavman.

Bogenvil tasol i gat wanpela atonomas gavman, tasol sampela ol narapela provins long Niugini Ailan rijon i wok long askim long kisim atonomi.

Sasindran Muthuwel, gavana bilong Wes Nu Briten Provins i tok PNG i bikpela kantri tumas, na gavman long Waigani i no nap lukautim olgeta tupela ten ol provins olgeta taim.

Em i tok Is Nu Briten na Nu Ailan Provins i laikim bai nesenel gavman i larim ol long kisim moa pawa long ranim na lukautim ol gavman bilong ol yet.

Planti Bogenvil pipal i wanbel wantaim humen rait festival

Human Rights Festival i pulim planti pipal i laik save long humen raits bilong ol.

Ol lain husat i go pas long dispela Papua Niugini Humen Raits Film Festival i kamap nau long Bogenvil i amamas tru long komyuniti intres oa laik bilong ol pipal long save moa long human rait bilong ol.

Dispela kempein long Atonomas Rijon bilong Bogenvil (ARB) i bin op long Buka long las wik Fraide na i go olsem tu long Arawa long Sentrel Bogenvil na Buin long Saut Bogenvil.

Agnes Titus husat i UN Kodineta bilong ol Meri long Bogenvil na memba bilong Not Bougenvil Human Rights Committee i tok i bin gat bikpela intres long ol komyuniti long save long ol rait bilong ol.

Em i tok long olgeta komyuniti, i bin gat planti toktok na planti askim i kam long ol man, meri na ol pikinini wantaim.

Mis Titus i tok Bogenvil ibin bungim bikpela hevi long taim bilong bikpela pait o crisis we planti tausen pipal i bin dai long en, na planti pipal ino bin save tumas olsem pasin no gut o hevi em ol i bin mekim egensim ol narapela pipal em i bin brukim ol humen rait bilong ol dispela pipal.

Solomon Ailan Palamen i no gut olgeta: Sir Allan

Sir Allan Kamakeza em bipo Palamaen spika long Solomon Ailan, i tok long tupela ten yia, em

i no bin lukim wanepla Palamen we em i no bin gutpela olsem dispela Palamen i pinis long mun Septemba.

Sir Allan Kamakeza i tok Palamen we i pinis long namba 8 Septemba i no gut olgeta.

Em i tok ol rekot i soim olsem planti long ol 50 memba i no bin mekim gut wok bilong ol olsem ol nesenel lejisleta o mekim ol loa na polisi bilong kantri.

Em i tok em i luk olsem planti long ol memba i no save gut long wok bilong ol olsem memba bilong nesenel Palamen.

Tasol Sir Allan i tok, Palamen opis yet i bin wokim sampela rifom o senis long sait bilong ol Stending Oda, na long mekim gut moa Palamen opis na ol haus na opis bilong ol memba.

Em i tok wanpela bikpela senis we em i laik lukim nau em long wanpela lo long atonomi bilong Palamen.

Vanuatu Torba Provins nau i gat tupela nupela bikpela skul

OL i opim vokesenel senta na sab senta bilong Yunivesiti bilong Saut Pasifik long Sola long las wik.

Mausman bilong Vanuatu gavman, Terry Manassah i tok Torba Provins bilong Vanuatu we i stap longwe long not bilong kantri long las wik i bin lukim bikpela developmen i kamap long sait long edukesen.

Dispela i bihainim opening bilong wanpela vokesenel trening senta na wanpela sab senta bilong Yunivesiti bilong Saut Pasifik long Sola.

Mista Manassah i tok gavman biong Australia nau i givim mani long bildim dispela TVET trening senta we i namba tu long kantri.

Namel long ol delegen we i stap long opening bilong tupela instusen ya em ol lida bilong proivins, ol bilong USP, Hai Komisina bilong Australia na Vanuatu Edukesen Minista.

Mista Manassah it ok provinsel gavman na pipal bilong Torba i amamas tru long ol nau ol i gat tupela institusen iblong eduketim ol yangpela long provins.

UN International Day bilong ol rural meri

LAS wik em International de bilong ol meri long ol rural eria long wol em United Nations (UN) i bin makim long luksave long ol wok na sindaun bilong ol meri long ol rural eria.

Long makim dispela bikpela de, UN Seketeri Jenerel, Ban Ki-moon, i tok ol meri long ol rural eria i gat strong long helpim long bringim gutpela sindaun long wol.

Em i tok tu olsem taim yu helpim ol meri long ol kain wok olsem egrikalsa na ol narapela risos, yu givim ol strong long go het na helpim ol wan wan komyuniti bilong ol.

UN i bin statim dispela International Day of Rural

Women long yia 2008, bilong luksave long bikpela wok em ol rural merin na ol asples meri i save mekim long ol wok egrikalsa, na tu wok bilong strongim fud sekyuriti, na daunim wari bilong poverty o tarangu pasin.

Long Pasifik rijon, ol meri long ol rural eria i save wok hat tru long helpim ol famili bilong ol na tu, helpim ikonomi bilong ol wan wan kantri bilong ol.

Long Papua New Guinea, PNG Wimen in Egrikalsa i wanpela lain we i save wok bung wantaim ol meri long rural eria long helpim ol yet na ol komyuniti bilong ol.

Maria Linibi i save go pas long dispela lain na mi askim em long wok bilong ol meri long ol rural eria ya.

Gavana bilong Wes Nu Britain Provins, Sasindran Muthuwel i tok em i gat bikpla bilip long helpim ol rural meri i kisim save long helpim ol yet na tu, ol narapela meri.

Long stat bilong deia yia, em i bin salim wanpela lain meri long provins bilong en i go long India long kisim skul long Barefoot Kolis long ol kain kain samting olsem rural ilektrisiti na ol narapela samting olsem.

PNG Polis i brukim lo egensim ol pipel

OL pipal i sutim tok long polis i brukim ol humen rait bilong ol pipel long Pot Mosbi long las wik.

I gat ripot long ol bikpla wari long ol polis i save kamapim bikpela trabel na paitim natin nating ol PNG pipel.

Planti pipal i tok ol i les tru long polis i kamapim trabel na hevi long ol pipel bihainim dai bilong wanpela lapun meri long Pot Mosbi long las wik Mande.

Ol i sutim tok long polis olsem ol i bin ranim wanpela lapun meri long Hohola long wanem em i bin wok long salim buai, na em i bin ronawe na wanpela bas i bin bamim em na em i bin dai.

Narapela samting em ol pipel i wari long en em pasin we sampela polis opisa i bin go na bagarapim na stilim ol samting long Juha Kolis, wanpela skul long Pot Mosbi na ranim na kamapim hevi long ol woklain na ol sumatin long dispela skul.

Dispela em i no namba wan taim bilong ol polis long brukim lo o i bin tok orait long kamap olsem ol polis opisa.

Planti taim long ol yia i go pinis, ol i save sutim tok long polis long paitim nating nating ol pipel, maski sapos ol pipel i brukim lo o no gat. Na planti pipal i save dai nating long han bilong ol polis.

Esther Igo bilong Women Arise PNG, em ogenaisesen i save toktok egensim vailens i tok i luk olsem polis i gat wanpela lo bilong en yet, na ol pipal i gat bilong ol yet.

Tasol Metropolitan Superinteden bilong Nesenel Kapitel Distrik, Andy Bawa i tok wanpela liklik lain polisman tasol i save bagarapim nem bilong PNG polis fos.

Ol Raun Nabaut Poto:



KATIM KEK: Ol mama na tisa bilong O'Conner Skul long Gerehu long Mosbi i katim kek bilong amamasim namba 7 bon de bilong Unity 4 Skwea Sios long Gerehu, NCD.



BANANA PULAP: Kokopo maket long Is Nu Briten i ples bilong ol garden kaikai na i no gat wanpela taim bai dispela maket i sot long kaikai. Ol i save salim ol banana long bandel.



AMAMAS LONG KISIM WARA: Amamas i kilim ol mama ya long Gorobe Setelmen long Mosbi Notis na ol i danis long soim dispela long taim bilong opim nupela wara saplai long eria bilong ol las wik. Ol pipal long Gorobe setelmen i no bin gat gutpela wara saplai long 20 krismas, tasol wantaim helpim bilong Mosbi Notis Memba, Justin Tkatchenko, Eda Ranu i bin pulim paipwara i go long ol. Ol Poto: Nicky Bernard

PNG rais projek i stat long Sentral provins

Stanley Nondol i raitim

RAIS projek long Papua Niugini i stat pinis long Gabadi long Sentral provins wantaim haibrid rais olsem pailot projek.

Bihain long gavman i wanbel long developa, Village Garden i soim olsem em i gat rait bisnis model bilong projek, projek bai go long olgeta hap long kantri.

Dispela pailot projek em developa, Village Garden i go pas na i wok long planim rais pinis long ples Gabadi long Kairuku distrik long Sentral provins.

Long las wik, Minista bilong Tred, Komes na Industri, Richard Maru wantaim ol tim bilong em long Nesanel Developmen Benk, Egrikalsa Dipatmen na Seketeri bilong Komes na Industri, John Andrias i go long rais projek long Gabadi, ausait long Mosbi.

Village Garden, em i wanpela kampani i go pas na plantim pinis rais. Em bai plantim rais long 10 hekta na



Dispela em graun we Village Garden I stretim na bai plantim rais long Gabadi, Sentral provins.

bai surukim i go moa long 100 hekta.

Kampani i stat pinis long planim rais long dispela wik na bai go het long neks wik.

Menesing Dairekta bilong Village Garden, Philip Davis i tok graun long Gabadi em i moa gutpela long rais.

Em i tok wok painim bilong em i soim olsem graun long Papua Niugini em i moa gutpela long planim rais.

Mista Davis i tok haibrid rais long Gabadi i ken

kamapim planti beg o tan na em i ken winim ol rais beg we Trukai i save kisim long Australia.

Em i tok, Village Garden bai mekim wok we gavman i laikim na i ken kamapim inap rais beg long givim saplai insait long kantri na salim i go aut long ol arapela kantri.

Dispela haibrid rais em bai Jasmine rais.

Village Garden i gat bikpela laik long wokim olgeta samting hia long kantri

long ol pipel i ken baim rais long liklik mani.

Sif Strejik Edvaisa bilong Village Garden, Jarry Anuk, i tok kantri i wok long kisim bikpela saplai bilong rais long Australia.

Em i tok dispela haibrid rais projek i ken senism impot bilong rais long Australia we olgeta yia kantri i save baim long K500 milien.

Mista Anuk i askim Minista Maru long gavman i ken sapotim developa long hap

graun long putim fekeri long Mosbi long wokim rais mil na pekim long peket na salim long lokol na ausait maket.

Minista Maru i tok gavman em i redi long givim helpim na tokim Mista Anuk long painim hap graun i stap nating long em i ken toktok wantaim Minista bilong Lens long stretim pepa wok na Village Garden i ken putim fekeri bilong rais.

Mista Davis i tok i gat nid long gavman na Village

Garden i mas kwiktai painim graun bikos ol mesin bilong rais fekeri i kam stap long sip na klostu taim bai kamap long Mosbi.

Mista Davis i tok kampani bai sanaim fekeri insait long narapela tri-pela mun long soim gavman olsem Village Garden i save long bisnis bilong rais na i sanap long raitpela rot long rais bisnis insait long dispela kantri.

PINIS//

Poto: long(L-R) Village Garden Sif Edvaisa, Jarry Anuk, Menesing Dairekta bilong Village Garden, Philip Davis, Minista bilong Komes na Industri, Richard Maru, Komes na Industri sekreteri, John Andrias, Ekting Menesing Dairekta bilong SBDC, Henry Marasembi, Philippines Embesda, Bien Tejano, deputi sekreteri bilong Agrikalsa na Laipstok, Potaisa Hombunaka long lukluk raun bilong ol long haibrid rais projek long Gabadi, Sentrel provins las wik.

Filipins bai sapotim PNG long teknoloji bilong rais projek

Stanley Nondol i raitim

KANTRI Filipins bain sapotim Papua Niugini long pailot rais projek wantaim teknoloji na tu, i laik kamap namba wan kastoma long wol taim PNG i salim rais i go aut long ol arapela kantri.

Filipins Embesada long kantri, Bien Tejano i tok kantri bilong em Filipins i gat bikpela save long rais long wol na em bai sapotim PNG long ol save ol i gat long helpim PNG long groim rais, na pekim rais long bikpela kwantiti na salim long lokol na ausait maket.

Embesada Tejano i tok em i wok moa long 10 -pela yia long kantri na i save gut

tru olsem Papua Niugini i ken groim rais bikos ol graun long nambis na hailans wantaim i gutpela long rais i ken gro.

Embesada Tejano i tok long Filipins i gat moa long 100 milien populesen na graun i sot tru, tasol ol pipel i save yusim liklik graun long planim rais na sapotim ol yet long kaikai na tu, salim wantaim.

Em i tok 7 milien populesen bilong PNG em i liklik tumas, na bikpela graun i stap nating.

Em i lukim dispela na wari olsem sapos PNG i yusim ol dispela graun na planim rais, em bai kamapim bikpela win mani long kantri na i ken salim long wol.

Embesada Tejano i tok

Philippines i gat bikpela save long rais i helpim planti kantri long Esia wantaim teknoloji bilong rais.

Em i tok Filipins nau bai helpim PNG long ol teknoloji, na PNG i ken lainim na i ken kamap bikpela rais produsa long wol bikos i gat bikpela graun i stap.

Ol sampela saveman long Filipins husait bai helpim developa, Village Gaden long Gabadi haibrid rais pailot projek i kam pinis long las wiken na i stap long Mosbi.

Ol mesin bilong rais fekeri i kam yet long sip.

Village Garden bai painim wanpela hap grun na wantaim helpim bilong Dipatmen bilong Lens na Komes na Industri bai sanapim rais

fekti long rais bai kamap long neks yia namel long mun Februeri na Mas.

Embesada Tejano i tok Filipins tu bai kamap namba wan kastoma long wol taim rais bilong PNG i redi long salim long wol maket.

Mista Tejano i tok longpela taim tru Papua Niugini i bin toktok long rais projek tasol no gat wok i bin kamap, na dispela projek i kamap long toktok tasol.

Embesada Tjano i tok em bai wok hat long Filipins i sapotim PNG long groim rais na singaut long ol pipel bilong kantri, gavman na developa long wok hat long lukim dispela rais projek i kamap bikpela, na wok i mas go gut na rais fekeri i mas kamap.

PM bai lonsim MSG Tred na Invesmen rotso

Stanley Nondol i raitim

PRAIM Minista Peter O'Neill long tude (Fonde) nait bai lonsim namba tu Melanisen Spiahet Grup (MSG) Tred na Invesmen Rotso we gavman bilong Papua Niugini bai holim long Pot Mosbi long mun Novemba.

Dipatmen bilong Komes na Industri na ol praivet sekta bai holim dispela miting long Novemba 28 i go long Novemba 30 long Mari Bareks long Pot Mosbi.

Minista bilong Komes na Industri, Richard Maru i tok olgeta bisnis haus na kopret kampani insait long praivet sekta, olgeta stekholda na ol gavman minista bai ol i singautim long kamap long dispela kibung.

Websait bilong dispela kibung tu ol bai lonsim.

Dispela websait bai gat ol

geta infomesen bilong namba tu MSG Tred na Invesmen rotso long helpim ol bisnis long luksave long rot bilong tred na invesmen long ol MSG kantri.

Nesanel gavman i givim K2.2 milien long Dipatmen bilong Tred Komes na Industri long kamapim miting bilong Tred na Invesmen bilong ol MSG kantri.

Ol memba kantri bilong sab-rijinol bodi bilong Melanesian Spia Het grup em Fiji, Vanuatu, Solomon Ailan, na Papua Niugini.

Bai gat tupela hap bilong dispela rotso. Narapela em tred fe na narapela em invesmen semina.

Tred fe bai kamap long Mari Bareks long 28 Novemba i go long 30 Novemba na na invesmen Semina bai kamap long Novemba 27 long Laguna Hotel long Mosbi.



OUR AMAZING TURA HALF PRICE FARES!*

50,000 SEATS AT HALF PRICE!





Air Niugini
www.airniugini.com.pg

Call Toll Free on **180 3444** or contact your nearest Air Niugini Travel Centre or Travel Agent for further details.

*Conditions Apply. 50% Discount applies to Domestic Fares. International Tura Fares also available. Call now!



7,200 kismis Fainensel edukesen trening long Enga

PLANTI tausen pipel long Enga provins i selebret long wanpela bikpela greduesen bihain long ol i pinisim fainensel trening wantaim sapat bilong Esian Developmen Benk (ADB) na Australia.

Deputi gavana bilong Benk bilong Papua Niugini (BPNG) na siaman bilong Stiaring Komiti bilong Maikro Ekspensen Projek, Benny Popoitai i givim setifiket long 7,200 manmeri long dispela wik long Tsak Veli long Wapenamanda long Enga provins.

Ol mausman bilong BPNG, provinsal gavman na ol arapela projek stiering komiti memba na ADB wantaim Australia i go lukim dispela bikpela greduesen

Mista Popoitai i tok nid bilong kismis save long fainensel edukesen na sevis i go bikpela long ol rurel eria.

Em i tok aninit long Maikro Ekspensen projek, ol pipel i wok long kismis save long kismis save long gainens na ol trening long namba wan taim.

Mista Popoitai i tok bikpela

salens bilong BPNG nau em long surukim dispela litresi kos i go long moa pipel long rurel eria long ol bai kismis save long fainens na putim ol yet long posisen long ol bai helpim ikonomi bilong kantri long gro.

"Dispela program i lukluk long givim fainensel edukesen trening long 120,000 manmeri long kantri long pinis bilong 2017na sapatimn fainensel na sosel empawamen bilong ol meri long kantri", Mista Popoitai i tok.



Planti ol meri i kismis fainensel edukesen trening pinis na i kismis setifiket long Task Veli, Wapenamanda distrik, Enga provins.



Air Niugini balus.

Moa Flait bilong Air Niugini long Krismas na Nu yia

BIKPELA balus kampani long kantri, Air Niugini i tokaut olsem em bai wokim moa ran bilong domestik flait long sampela long givim sevis bilong diman bai kamap long dispela taim bilong Krismas na Nu Yia stat, long Oktoba 26 2014.

Sif Eksekutiv opisa (CEO) bilong Air Niugini, Simon Foo i tok ol sampela hap we Air Niugini bai kamapim moa flait em; Mt Hagen, Kavieng, Hoskins, Lae, Kundiawa, Madang, Wewak, Mendi, Daru, na Pot Mosbi/Lae/Hoskins/Rabaul,

Pom/ Lae/Manus na Pom/Lae/Buka.

Air Niugini i paim flait long POM/ Hagen i go antap long 4 long wanwan de, POM/Lae i go long 5 long wan wan de, Kundiawa, POM / Madang na Pom/ Wewak i go long tupela flait long wan wan de.

Bai i gat 4 -pela flait i go long Mendi long wan wan wik na 3-pela flait i go long Kundiawa.

Daru bai lukim i gat wanpela flait moa na bringim total namba bilong flait i go long 5 long wan wan wik insait long

Krismas na Nu Yia taim.

POM/Lae/ Hoskins/ Rabaul bai gat 4- pela flait long wan wan de. POM /Lae/ Manus i go antap long tupela long wan wan wik. Na long Trinde, balus bai go olsem long POM/Lae/ Buka.

Bikpela balus, Fokker 100 bai ran long POM/Gurney.

Mista Foo i tok Air Niugini i apim ol namba bilong flait long givim sans long ol kastoma long makim long wanem taim ol i laik long ran long balus.



6hp K3,950
9.9hp K4,400
15hp K5,495
30hp K7,995
20hp 4 stroke Special K8,500
40hp K8,480
60hp K15,000
12 Months Guarantee
Quality-Service-Price

TRADE IN ANY OLD MOTOR OR BOAT AND



STIHL MS 070 36". Normally K5,400, Now K2,850. STIHL MS 720 36" bar. Normally K6,500, Now K3,000 Saw mill attachment K890.00



TOURNAMENTSIZE 96" PRO. SET. POOL TABLE Normal price K4,980 Special Price Only K2,850.

ESL-16 Solar Integrate Street & Coutryard Light

- 1.48 LED total 12 Watt + 14.5W solar panel on Extremely wide lighting Area
- 2.Over 30 hours lighting time, can support 5-6 cloudy or raining days
- 3.Replacable Lithium battery with Big 26400mah Capacity
- 4.Intelligent Lighting mold: 5 hours Lasting lighting time Fristly + Motion Sensor lighting
- 5.Integrate Solar panel and LED panel with Bulid in Switch

Specifications:

1. solar panel.35W
- 2.Li-ion battery: 293WH
- 3.LED: 2000Lumens bright light,6000K
- 4.lighting mode: 5Hrs 100% light+ 25% light till dawn
- 6.Install height: 4-5 meters
7. Waterproof:IP65
6. Material: Aluminium alloy + steel glass
7. Work temperature:-20°C to 55°C
8. Size: 488*1091*118.5mm

Application: Courtyard/ Garden/ Park/Street/Roadway/ pathway/Parking Lot/Private road/Sporting, Sidewalk/Public square/ plaza/Campus/Airfield/ Farm & Ranch/Perimeter Security/ Wildlife area/Remote Area/Military Base


Price K1,495.00 Posts Excluded



Solar Lantern with phone charger, USB, and radio & USB fan. Normally K290 Now K150.00



400AMP Jump Leads. A must for every car K50



1,000 Liter Water Storage Tanks Normally K980 Now only K480




N70 MAINTENANCE FREE BATTERIES RETAIL K480 SPECIAL K200



43CC Brush Cutter with 3T Blade. Retail K1,495. Our SPECIAL Price Only K495

ISAS Group Limited
Wards Road, Enter Rabaul Ave, Towards Ben Moide Club Murray Barracks, PNGDF Supply Shed #3, Port Moresby Telephone: 3231229 / 325 1205 Mobile: 70882331 Email: john.s@isas.com.pg





Toksave: Stap longwe long paiplain bilong Ramu NiCo

RAMU NiCo Projek insait long Madang provins i salim wanpela toksave i goaut pinis long ol manmeri husat i wokim haus, na ol arapela samting antap o klostu long paiplain ron namel long KBK Main na Basamuk Rifaineri long wanbel na rausim i go longwe long paiplain.

Kampani i givim notis pepa long wanpela wik i go pinis na dispela wik stat long Mande Oktoba 20, ol wok lain i bin kamapim wanpela awenes long ol papa na mama graun stat long Usino Bikples, long Tunde i bin kamap long Iguruwe, aste Trinde long Ono na bai pinis long tude Fonde long Naru.

Wankain aweanes bai kamap long Kostel Paiplain i go inap long Basamuk. Dispela paiplain we karim graun malumalu wantaim wara tasol o slari i stat long KBK Main na pinis long Basamuk Rifaineri na i ron 135 kilomita olgeta.

Ramu NiCo Komyuniti Afes (CA) Dipatmen wantaim ol lenona asosesin (LOA) na ol komuniti lidas i bin kamapim dispela aweanes we ol i bungim na tokim ol asples lain long tingting bilong Ramu NiCo we i sanap strong olsem ol haus maket na haus slip o skul, hausik na ol narapela kain haus we i sanap klostu long dispela paiplain em ol i mas rausim na kisim i go longwe moa long 15 mita.

Kampani i sanap strong tu olsem dispela wankain aweanes em CA opis i bin karim aut bihain na long taim kampani i silipim paip tu we i tok olsem i no seif long ol pipol i stap klostu long paip.

Ramu NiCo i luksave olsem taim kampani i laik kamap long mak bilong 80% disain kapasiti i go 100% disain kapasiti bai nogut i bai gat sampela kain birua i kamap long paip taim presa i antap tumas. Tasol long wankain taim, Ramu NiCo i sanap strong yet olsem dispela paip i ken winim moa mak olsem 20-pela kismas na i go antap. Na maski i gat sampela buruk i kamap, bai nogat wanpela posin nogut i kamaut long wanim paip ya i karim graun malumalu na wara tasol.

Tasol Ramu NiCo i gat bel hevi long ol liklik maket na haus we kamap antap long paip na klostu long paip i ken bungim sampela birua sapos paip em i bruk na wara i sut strong tru na kamaut wantaim bikpela na strongpela presa. Kampani i bai daunim presa long fixim paip tasol dispela bai nidim sampela taim na pas-taim bai i gat sampela birua i kamap pinis.

Kampani i tokim ol pipel tu olsem dispela 15 mitas igo 30 mitas longwe long paip em hap mak graun we i stap aninit long Main Ismen we paiplain i silip antap na ol papa graun bai kisim royolti long em na ol i nogat rait long kamapim haus maket na silip antap long dispela 15 i go 30 mita hap mak graun.

Na arere long Usino Jansen i kam klostu

long Tapo wara we paip ron klostu long rot em sampela hap paiplain i stap antap long graun bilong gavman we rot i ron long en tasol sampela i stap antap long asples graun na Kampani wantaim gavman i luksave long dispela na askim ol pipel long noken wokim haus na stap klostu long paip.

Planti haus bilong maket na haus-slip em i gat luksave olsem ol i kamapim bihain long paiplain i silip pinis na Kampani CA lain, ol LOA na lida man i wokim aweanes long ol dispela lain bai muv go stap longwe long paiplain ya.

Long wankain taim, Kampani i luksave olsem sampela haus, skul, hausik, maket, sios na ol narapela pablik utiliti i bin stap pastaim bihain long paip i slip antap long graun na Kampani i nau kamapim aweanes na kisim tingting bilong ol pipel long wanem kain wanbel tingting bai i kamap long ol dispela haus na infrastraksa bai ol i rausim na surukim i go longwe.

Planti papagraun i toktok olsem ol i bin stap longpela taim na haus or skul na ol hausik wantaim haus lotu tu i bin sanap bipo na ol i laikim Kampani i bai salim ol saveman long bai glasim gut ol velu bilong ol dispela samting na bai wanbel tingting kamap long Ramu NiCo i ken helpim ol long painim nupela hap graun long movim ol go longwe long paip.

Ramu NiCo CA woklain i tok ol kain tingting na bel hevi bilong ol papagraun bai ol i kisim na sindaun wantaim menesmen bilong Ramu NiCo long kamapim sampela wei long stretim wanbel pasin long bai ol papagraun i muv i go longwe long paiplain mak moa long 15 mitas.


Ramu NiCo i tok tu olsem kampani i bilip olsem nogat wanpela bikpela hevi bai kamap long dispela paip tasol nogut bai sampela kain hevi bai kamap bihain na bagarapim ol manmeri olsem na long abrusim hevi, i moa beta ol pipol i mas mov i go longwe long paiplain eria.

Kampani i tok tu olsem paiplain i sanap pinis long dispela bikpela nikel na kobalt projek insait long Madang provins we gavman i bilip sapos olgeta prodaksen i kamap orait long inapim tingting stret bai i gat planti gutpela helpim i go long ol papagraun long Usino-Bundi na Raikos, Madang provins na kantri tu. Olsem na ol i askim ol papagraun i mas wok wanbel wantaim Kampani long kamapim wanpela gutpela tingting na bel long olgeta i mas wanbel long lukim dispela projek go het yet.

Kampani i tokaut tu olsem em i nogat tingting long kisim polis o kot-oda long rausim ol pipol klostu long paiplain. Em i tok i gat pasin bilong ples na pasin Madang stret long sindaun wantaim na kamapim wanbel tingting long stretim dispela hevi bilong Paiplain.



Mano ples haus maket i stap antap long paip na i no seif.



Miraine Maket we ol mama na pikinini i stap klostu long paip em i no seif na ol i mas mov tu.



Dispela haus long Anieke asples long Usino em ol i wokim bihain klostu long paip na i no seif.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela
Ramu NiCo,
Wanpela
Komyuniti'**

Sime Darby laik kamap papa bilong NBPOL

WANPELA kampani bilong kantri Malaysia ol i kolim Sime Darby Plantesen i tokaut las wik olsem ol i laik baim sampela moa se long New Britain Palm Oil Limited (NBPOL).

Sapos ol baim bikpela se long NBPOL, ol bai kamap olsem nupela papa bilong NBPOL long taim 2014 i pinis.

Sime Darby Plantesen i tingting olsem ol bos bilong NBPOL bai wanbel wantaim tingting bilong ol.

Sime Darby Plantesen i namba wan long olgeta hap graun long mekim welpam (oil palm), na bikpela bosman bilong ol, nem bilong em Mohd Bakke Salleh i tok, "Dispela baim i bikpela samting tru Sime Darby i wokim."

Em i tok tu olsem "NBPOL na Sime Darby Plantesen i tupela wankain kampani, na mipela i ken wok gut wantaim, na dispela bisnis bai kamap strong tru."

Sime Darby Plantesen na NBPOL i save tru long lukautim welpam na long olgeta samting li sut long graun na ples.

Sime Darby Plantesen i

save pinis tru long pasin didiman; ol i gat planti plantesen na bikpela graun long kantri olsem Liberia, Indonesia na Malaysia.

Olsem na Sime Darby Plantesen i save gut long wok wantaim ol pipel na gavman, na i save gut long helpim ol papagraun na viles i stap klostu long ol plantesen bilong Sime Darby.

"Taim bilong wok na i no toktok tasol," Maru

Stanley Nondoli raitim

"TAIM bilong toktok planti long save na biknem i pinis. Nau em i taim bilong mekim wok na soim wok bilong yu olsem yu ken mekim na bihain yu ken toktok moa long wanem samting yu save," Minista bilong Tred Komes na Indastri, Richard Maru i mekim dispela toktok long Gabadi long Sentral provins taim em i go lukluk raun long haibrid rais pailot projek long las wik.

Minista Maru i tokim projek developa Village Garden, na ol mameri hasat i stap long hap olsem planti taim planti toktok i kamap long ol sampela investa olsem ol i gat risos, teknoloji na manpawa o ol wokman olsem ol i ken planim planti rais long kantri.

"Planti yia i go pinis ol planti i save toktok tumas. Nau em taim bilong toktok na maus wara nabaut long

winim bel bilong pipel na gavman i pinis. Wokim wok na mekim i karim kaikai long mak gavman i laikim, na bai yu kisim moa sapot," Minista Maru i tok.

Pailot rais projek bilong kantri i kamap long Gabadi long Sentral provins.

Na sapos gavmanwanbel long wok bilong Village Garden long 12- pela mun, (gavman) em bai givim tokorait long dispela rais projek bai rolaut long ol arapela provins.

Sif Edavisa bilong Village Garden, Jarry Anuk, i tok planti kantri long Esia i wok long kamap bikpela indastri bikos gavman i sapotim ol liklik bisnis long gro.

Em i tok Village Garden i gat bilip olsem rais projek bai kamap bikpela.

Em i tok tripela man i ken wok long wanwan hekta. Sapos i gat 10, 000 hekta, 30 000 wok bai kamap long kantri.

Tik-wud neseri projek ken strongim PNG fores bisnis

James G. Kila i raitim

WANPELA diwai we planti lain long Madang i save kolim olsem 'Yati' i gat planti gutpela wok bilong en.

Biknem bilong diwai ya em 'Tik-wud'.

Tupela marit long Erima long Astrolabe Bei eria long Raikos distrik i planim ol diwai long diwai neseri bilong ol, na Daniel Abuta wantaim meri bilong em Betty i lukautim neseri i gat kuru diwai o sidlings long neseri.

Mi bin kisim stori long email long tik wud projek long Dokta Tony Page em wanpela saveman o dokta long James Cook Yunivesiti long Australia.

Projek i stap long Erima na tupela arapela eria long Madang em Aronis long Sumgilbar eria na long Ohu long Trans-Gogol eria.

As tingting bilong dispela projek em long kamapim gen ol timba risos long ol eria insait long provins we ol wail diwai bilong bus i go pinis nau.

Na tu, long helpim ol komyuniti long luksave long wok bilong menesim diwai na timba risos bilong ol long kamapim ol timba bilong wokim haus. Na tu, long sapotim bisnis bilong wokim sia na tebol na kisim mani long sapotim sindaun bilong famili na komyuniti bilong ol.

James Cook Yunivesiti na Forest Risets Institiut (FRI), wantaim mani helpim i kam long Australia Senta bilong Intanesenel Egrikalsa Risets (ACIAR) i menesim dispela projek long Madang.

Projek i go het wantaim helpim bilong Faundesen bilong Pipel na Komyuniti Developmen long Madang provins, we i wok klostu wantaim tripela komyuniti long Erima long Astrolabe Be LLG long Raikos, Aronis long Sumgilbar LLG long



Daniel i soim nupela kuru i gro long neseri eria

Sumkar na Ohu long Trans-Gogol LLG long Madang distrik.

Dokta Tony Page yet i projek lida husat i wok klostu wantaim ol Madang komyuniti stat long 2012 i kam. Em save wok klostu wantaim Linzon Zamana bilong FPCD long strongim projek wok-bung wantaim ol lokal komyuniti.....

Dokta Page i tok long nau yet, ol i wok wantaim ol lain fama husat i wok i go pas long kamapim ol sid ol i ken yusim long givim aut long ol smolholda groa long ol ples na hauslain.

"Bikpela as tingting bilong

mipela em long kamapim ol gutpela kuru tik-wud sid bai sevim ol pipel long taim ol i planim na kamapim ol gutpela diwai.

"Mipela bilip olsem neseri indastri bai saplaim ol sid na sidlings bilong tik-wud wantaim ol arapela strongpela asples diwai olsem taun, talis, galim na kamarere long givim i go aut long ol papagraun long ples na hauslain long planim long eria bilong ol," Dokta Page i tok.

Dispela tik-wud projek i save lukluk long ol wok kamap insait long ol trening em i kamapim na ol kon-

saltesen woksop na tu lukluk raun na komyunikesen wantaim ol memba insait long komyuniti.

Dokta Page i tok ol komyuniti i wok hat stret long planim ol diwai na ol i wok long givim aut ol sid yet long ol komyuniti long eria.

Em i tok long PNG projek i wok klostu wantaim ol NGO na ol gavman ejensi olsem OTDF (Ok Tedi Developmen Fan) long Westen provins, OISCA, UNRE (Yunivesiti ov Netsurel Risoses na Envairomen), na Pasifik Ailan Projek (PIP) long Is Nu



Kapa i soim mak blong spisis bilong tik-wud. Ol Poto: James G. Kila

Briten na Faundesen bilong Pipel na Komyuniti Developmen (FPCD) long Madang.

Tik-wud i save kamapim naispela timba na prais bilong en i antap stret long intanesenel maket.

Timba bilong Tik-wud em naispela na strongpela, na ol strongpela na i save wokim ol naispela sia na tebol we il save stap longpela taim.

Dokta Page i tok narapela samting we i kirapim bel bilong ol long strongim wok bilong tik-wud wantaim ol fama long PNG em bikos diwai ya i isi long gro, na tu

em i ken kamap gut long ol ples na graun long kantri.

Ol komyuniti fama long Erima, Aronis na Ohu i wok gut wantaim tik-wud bikos ol yangpela kuru na siding i gro gut stret na kamap hariap, winim ol arapela diwai olsem Kwila.

Dokta Page i tok long nau yet ol i bringim ol tik-wud sid we i gat blut-lain bilong diwai i kam long PNG yet, Solomon Ailan, Costa Rica, Saina na India.

Tik-wud timba bai bringim gutpela helpim i go long ol famili na komyuniti na bikpela samting long Madang provins.

SPB program long helpim ol spot manmeri

2015 PASIFIK Gems i kam klostu nau na South Pacific Brewery (SPB), i tokaut long nupela program bilong ol long helpim ol spot manmeri husat i wok long redi long dispela bikpela pilai.

Dispela program em ol i kolim long Gold Etlit Program na tripela spot manmeri i kisim sapot pinis aninit long dispela program.

Ol dispela tripela spot manmeri em Jack Viyufa long bodibilding, Betty Burua long etletiks na Abigail Tere Apisah long tenis.

Mani mak we SPB i putim long baset long go het wan-

taim dispela program em K1 milien.

Papua Niugini Olimpik Komiti (PNGOC), i wok bung wantaim SPB long lukim olsem dispela program i ran gut.

Seketeri Jenerel bilong PNGOC, Auvita Rapilla, i tok ol i makim ol spot manmeri husat i pilai pinis long Pasifik Gems level na husat i winim medal pinis na i gat sans long winim medal gen long neks yia.


Em i tok ol dispela spot manmeri i ken winim medal gen na ol i nidim kain sapot we SPB i givim long strongim

ol long kamapim gutpela pilai.

"Aninit long Gol Etlit Program, ol spot manmeri bai kisim gutpela trening long ol gutpela kosa, na yusim ol gutpela fasiliti long trening na redi," Seketeri Jenerel Rapilla i tok.

SPB Ivents Menesa, Abigail Popoitai, i tok olsem dispela program em i kam aninit long bikpela spona (K4 milien) we SPB i givim long 2015 Pasifik Gems.

Mis Popoitai i tok i bai gat sampela moa toksave long husat ol spot manmeri SPB bai sapotim bipo Pasifik Gems i stat.



Jack Viyufa i bin winim gol medal long 2007 Pasifik Gems long Samoa.

Betty Burua i bin winim tupela gol medal long 2011 Pasifik Gems long Nu Kaledonia.



WFA Presiden tok tenkyu long ol sponsa

Paul Fuzo i raitim

PRESIDEN bilong Wewak Futbal Asosiesen (WFA), Jeffery Loks Leni, i givim bikpela tok tenkyu i go long olgeta sponsa husat i givim sapot bilong ol long WFA long dispela yia.

Mista Leni i tok sapot bilong ol sponsa i helpim asosiesen long pinisim gut ol pilai bilong en wantaim gutpela gren fainel long las wiken.

Em i tok WFA i bin wok strong tru long dispela yia long traim long karim aut gutpela plen bilong en long lukim soka insait long provins i go het.

"Sapot bilong ol sponsa i helpim WFA long ran gut," Mista Leni i tok.

Ol sponsa bilong WFA long dispela yia em Opis bilong Gavana, Deputi Gavana, Memba bilong Angoram, Saiset Limited, South Sea Tuna Corporation, Opis bilong Taun Meya, Premium Investment, Wewak Agency, Don Ong, More Stationary, Provinsel na Nesenel Woks, na ol arapela manmeri husat i bin givim sapot bilong ol.

Presiden Leni i tok tenkyu tu i go long olgeta klap na ol menesa wantaim olgeta pilaia husat i wok bung gut tru wantaim WFA.

Presiden i tok, bikos long dispela gutpela sapot bilong ol sponsa na ol klap, WFA i lukim gutpela gren fainel long premia divisen

we Mud Skippers i winim Defense 3-0.

Long anda 21, Defense i winim Gepma 2-0, na long divisen bilong ol meri, sempion bilong las yia, Hearts, i kisim bek taitel bihain long ol i winim Wewak Central 1-0 insait long 5 penalti kik.

Mista Leni i tok WFA bai redim wanpela ripot long givim i go aut long olgeta sponsa na klap.

Presiden Leni i tok long neks yia, WFA i laik bringim planti pilaia i go aut long pilai long ol tonamen autsait long ol arapela provins.

Em i tok dispela bai helpim ol pilaia bilong WFA long kisim planti ekspirians, na tu, lainim ol long pilai insait long ol bikpela pilai, na putim wanpela tim insait long NSL.



Hearts winim soka taitel gen long divisen bilong ol meri long Wewak.

Meninga; Em i no isi long winim ol wol sempion

Michael Novingu i raitim

KOSA bilong ol Kumul, Mal Meninga, i tok olsem em i no isi long winim ol wol sempion bilong ragbi lig, Australia.

Em i bin tokim *Wantok Niuspepa* long dispela mun bihain long Australia PM 13 skwat i winim ol PNG Kumul.

Mista Meninga i tok olsem i tru olsem PM 13 skwat bilong Australia long dispela yia i pulap long planti yangpela pilaia husat i no gat ekspirians long pilai long Papua Niugini, tasol stail

pilai bilong ol i antap moa yet, na ol tim husat i laik winim i mas gat gutpela plen.

Em i tok ol pilaia bilong em i bin gat planti sans long skoa, tasol ol i bin painim hat bikos difens bilong ol Australia i bin strong tumas.

Mista Meninga i tok ol bai traim gen long neks yia na lukim sapos ol i ken winim ol wol sempion o nogat.

Kosa bilong ol PNG Kumul, Mal Meninga.



Nesenel boksen sempionsip bai kamap long Goroka

Sape Metta i raitim

ISTEN Hailans Amatua Boksen Asosiesen (EHABA), i wok hat nau long mekim wok redi long hostim bikpela Nesenel Boksen Sempionsip we bai kamap long Goroka long Disemba dispela yia.

Asosiesen Seketeri, Tim Gawot, i tok, planti ol boksen senta i no save long dispela, long wanem, toktok i no save go aut long ol midia long ol i ken luksave na redim ol boksa bilong ol husat i ken salens long dispela sempionsip.

Em i tok, asosiesen na ol boksa bilong Isten Hailans i wok long kamapim strongpela trening nau long redim

ol yet bipo long dispela sempionsip i stat.

Mista Gawot i tok amamas long ol menesmen bilong Nesenel Spots Institut (NSI) husat i givim jimnesium (gymnasium) fri i go long ol boksa long yusim long trening bipo long ol i salens.

Em i tok amamas tu long memba bilong Unggai/Bena na Stet Minista bilong graun, Benny Allen, long tok orait long i go pas olsem patron bilong EHABA.

Mista Gawot i tok, long taim asosiesen i bin tok orait long bringim na hostim Nesenel Boksen Sempionsip long Goroka, Mista Allen i bin sapotim asosiesen i kam inap nau.

Genia stap long Wallabies skwat gen

WILL Genia i bin putim wanpela gutpela pilai tru long las wiken taim tim bilong em Brisbane City i winim Canberra Vikings 37-16.


Stail pilai bilong em long dispela gem i mekim ol selekta bilong Australia Wallabies i makim em long stap long skwat we bai go long pilai long Yurop long neks wik.

Bipo long Genia i go pilai wantaim Wallabies long Yurop, ol Brisbane City bai nidim em long pilai strong long dispela wik Fraide taim ol i salensim ol NSW Country Eagles long

semi-fainel bilong Nesanel Ragbi Sempionsip (NRC).

Eagles i bin winim Perth Spirit long las wik long kwalifai long pilai long semi-fainel. - AAP

Skramp hap bilong Wallabies, Will Genia



Ol ragbi pilaia bilong Samoa mekim hevi long Australia

OL Memba bilong Samoa ragbi lig tim we bai pilai long 4 Nesen tonamen long Australia i bin mekim hevi na ol polis i holim ol.

Long ripot bilong Courier Mail, ol polis i sasim 8-pela memba bilong Samoa ragbi lig tim long Tunde bihain long ol i bin spak na mekim kain kain nois autsait long wanpela nait klap long Brisbane.

Ol polis i bin holim pilaia bilong Samoa na senta bilong North Queensland Cowboys, Tautau Moga.

Strongpela lok bilong ol Bulldogs, Reni Maitua, i bin stap insait long nait klap na ol i bin holim pasim em tu.



Tautau Moga, wanpela bilong ol pilaia bilong Samoa we ol polis i holim em.

PNGFA givim skul long ol kosa bilong TSA

OL kosa bilong Tabubil Soka Asosiesen (TSA), i bin stap insait long wanpela soka woksop bilong ol kosa long helpim ol long kisim moa save long dispela spot.

Papua Niugini Futbol Asosiesen (PNGFA) na Osenia Futbol Konfederesen (OFC) i go pas long dispela woksop.

Dispela woksop i lukim 25-pela kosa i stap, 7-pela bilong ol dispela kosa em ol meri.

Ol dispela kosa em ol kosa bilong ol soka tim bilong TSA olsem BRB, Oksie, Wang Lakers, Chauka, Sakups, Skotaks, Kimi, DX Zeros, KHL, Sandaun, Dufo, Aiinems, na Kabdep.

Tupela man husat i bin go pas long toktok long dispela woksop em Teknikel Dairekta bilong PNGFA, Taku Niebo na Sauten Rijen Dvelopmen Opisa, Gori Sioni.

Dispela woksop i bin

kamap long 4-pela de, stat long Oktoba 13 na pinis long 16.

Ol kosa husat i stap insait long dispela woksop i bin lainim ol sampela prektikol samting na sampela samting long sait bilong menesmen, na sampela gutpela rot long toktok na givim gutpela tingting long ol pilaia bilong ol.

Long dispela woksop, Mista Niebo i tok TSA em wanpela ektiv memba bilong PNGFA.



Ol kosa bilong Tabubil Soka Asosiesen. Poto OTML

Sonny Bill amamas long go bek long yunien

BIKNEM spots man bilong Nu Silan, Sonny Bill Williams, i tokim Nu Silan TV olsem em i amamas long kam bek na pilai ragbi yunien bihain long em i lusim Sydney Roosters long NRL.

Sonny Bill stat pilai wantaim ol Counties pinis na ol selekta bilong Nu Silan All Blacks i putim bikipela ai pinis long em na tok olsem em bai pilai long All Back skwat.

Ol kosa bilong ol ragbi yunien klap long Nu Silan i amamas long lukim Sonny Bill i kam bek long ragbi yunien.

Kosa bilong Auckland, Paul Feeney, i tok em i amamas long lukim Sonny Bill i kam bek, na em i gat strongpela bilip olsem planti kosa na ol klap long toktok long kam bek bilong dispela biknem spot man.

PNG Etletiks tim kam bek wantaim gutpela nius

PNG Etletiks tim we i bin go long Osenia Kros Kantri Sempionsip long Guam, i kam bek pinis long kantri long dispela wik wantaim sampela gutpela nius.

Simbai Kaspar na Kupsy Bisamo, tupela memba bilong PNG Etletiks Tim long divisen bilong ol man, i bin pilai gut tru na kisim sampela gutpela mak long soim olsem ol i redi long 2015 Pasifik Gems.

Long 5000 mita resis, Kaspar i kisim brons medal taim em i pinisim resis wantaim 42 minit na 56 seken. Bisamo i pinisim resis bihain tasol long Kaspar wantaim 42 minit 54 seken.

Long dispela 5000 mita resis, Australia i kisim gol na Nu Silan i kisim silva.

Long 8 kilomita resis bilong ol meri, Mary Kua i mis aut long medal taim em i pinisim resis long namba 4 ples bihain long Australia, Nu Silan na Tahiti.

Jenny Albert long junia divisen bilong ol meri, i bin winim 6 kilomita resis wantaim 25 minit na 16 seken.

Abel Siune na Ongan Awa i bin resis gut tru long anda 18 divisen. Awa i bin namba 3 man long pinisim resis na Siune i pinisim resis long namba 4.

Tonga amamas long wok redi bilong Pasifik Gems

WANPELA deligesen bilong Tonga 2019 Pasifik Gems i bin raun i kam long Papua Niugini long las wiken na tok ol i amamas long wanem samting ol i lukim long ai bilong ol.

Siama bilong Tonga 2019 Pasifik Gems, Fred Sevele, na Seketeri Jenerel bilong Tonga Olimpik Komiti, Taki-toa Taumoepeau, i bin bung wantaim ol memba bilong Papua Niugini Olimpik Komiti na kisim olgeta infomesen ol i laikim long wok redi bilong dispela bikipela pilai.

Deligesen bilong Tonga i bin toktok wantaim Sif Eksekutiv Opisa (CEO) bilong 2015 Pasifik Gems tu, Peter Stewart.

Long bung bilong ol wantaim em, Mista Stewart i tokim ol long ol nius na stori bilong wanem samting i redi pinis na wanem samting i no redi yet.

Mista Stewart i tok deligesen bilong Tonga 2019 Pasifik Gems i bin amamas tru taim ol i harim ol stori na lukim ol fasiliti long ai bilong



Deligesen bilong Tonga i bin amamas tru long wanem samting ol i lukim long ai bilong ol.

ol. Mista Stewart i tok deligesen bilong Tonga i tok ol i lukim planti gutpela samting, na tu, lainim planti samting long raun bilong ol i kam long Papua Niugini. Em i tok ol bai go bek long

Tonga wantaim wanem samting ol i lukim na lainim, na ol bai serim wanem samting ol i lainim wantaim ol manmeri long kantri bilong ol long redi long Pasifik Gems we bai kamap long Tonga long 2019.

Ol spot poto long wiken...

OL SAPOTA: Ol sapota bilong Kumul i amamas long Kalabond ples bilong pilai.

Ol Poto
Isaac Liri
na Nicky
Bernard.



JUNIA KUMULS: Planti yangpela mangi husat i save pilai long Skulbois Ragbi Lig long kanti, i gat bikpela driman long pilai wantaim ol Kumul taim ol i go bikpela. Dispela tripela mangi i save olsem trening na hat wok tasol bai mekim ol i kamap ol gutpela pilaia long taim bihain.

MALOLO: Ol pilaia bilong Saunten Rijon i malolo long hap taim long taim bilong Nesanel Sempionsip.



OL KUMUL LONG PLES BALUS: Ol PNG Kumul long Nadzab ples balus long Morobe taim ol i redi long salensim ol Tonga long las wiken.



PILAIA BILONG BIPO NA PILAIA BILONG NAU: Yutiliti man bilong ol Hunters na Kumuls, Noel Zemming, wantaim bipo ragbi pilaia bilong Kone Tigers, Steve Malum



OL BIG BOIS: (L-R) Deputi Prais Minista, Leo Dion, Spot Minista, Justin Tkatchenko, na Is Nu Briten Gavana, Ereman Tobaining.

TOKSAVE: Salim ol spots dro bilong yu kam long Feks; 325 2579, e-mel; bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



Moa oil na meat insait



Meninga amamas long win bilong ol Kumul

Isaac Liri i raitim

BIHAIN long ol i lus long Australia long PM's 13 salens long Kokopo long wik antap, ol Papua Niugini Kumuls i mekim kantri amamas taim ol i winim Tonga long las wiken long Lae.

Dispela pilai i bin wanpela strong-pela pilai na Kosa bilong ol Kumul, Mal Meninga, i tok ol Kumul i bin

mekim bikipela wok tru long daunim ol traipela fowod bilong Tonga.

Mal Meninga i tok ol Tonga i bin putim planti presa antap long ol Kumul. Em i tok ol i bin luk bikipela long sais, na tu, ol i bin gat spit long namel na arere bilong fil.

Wanpela samting tu we i bin mekim em na ol arapela opisa bilong Papua Niugini Ragbi Futbal Lig (PNGRFL) i amamas, em bikos olgeta

pilaila bilong Tonga i save pilai long NRL level, na nogat wanpela pilaila bilong Kumul i save pilai long A gret level bilong NRL.

Planti bilong ol pilaila bilong ol Kumul i kam long PNG Hunters, na wan wan tasol long ol risev gret bilong NRL na Digicel Kap.

Kosa bilong ol Tonga, Kristen Woolf, i amamas long gutpela pilai bilong ol Kumul, na em i tok stail pilai

bilong ol i gutpela moa na planti pilaila i gat skil na save long pilai long NRL sapos ol i trening strong moa.

Mista Woolf bai stap olsem kosa bilong, Townsville Hawks, wanpela nupela tim bilong Intrust Super Cup long next yia.

Olsem kosa bilong Intrust Super Cup kompetisen long neks yia, em bai gat planti sans long glasim gut stail pilai bilong ol Hunters.

**Pasifik
Gems i
kam
klostu
nau
- P25**

**Genia
stap long
Wallabies
skwat gen
- P26**

Featured Products

- *Treated Mosquito Nets Prevents Malaria
- * Visitect Tests for Malaria
- * Arterakine Tablets Treat Malaria (artemether & piperaquine phosphate)

Good Products, Better Prices, ikam long.

Johnstons Pharmacies Ltd

Phone 325 3185 Fax 325 0190 Email sales@johnstons.com.pg